


景  
文  
集  
一





景  
文  
集  
一

宋祁撰



中華書局

叢書集成初編所選聚珍版叢書及佚  
存叢書皆收有此書聚珍版輯自永樂  
大典爲卷六十有二佚存本拾海外殘  
叢得卷三十有二僅有其半故據聚珍  
本排印並附佚存本於後凡佚存本有  
聚珍本無者存之相同者則於目下注  
已見聚珍四字不錄其文

## 四庫全書總目提要

案景文集宋祁撰。祁字子京，開封雍丘人。天聖甲子，與其兄庠同舉進士，累官翰林學士承旨，謚景文。事迹具宋史。晁公武讀書志謂祁詩文多奇字證以蘇軾詩，淵源皆有攷。奇險或難句之語，以今觀之，殆以祁撰唐書，彫琢剗削，務爲艱澁，故有是言。實則所著詩文博奧典雅，具有唐以前格。殘膏賸馥，沾句靡窮，未可盡以詰屈斥也。陳振孫書錄解題又稱祁自言年至六十，見少時所作，皆欲燒棄。然攷祁筆記有云：年二十五，卽見奇于宰相夏公，試禮部，又見稱于龍圖劉公。蓋少作未嘗不工。晚年特爲進境，至于舉陸機之謝華啓秀，韓愈之陳言務去，以爲爲文之要。則其生平得力，具可想見矣。祁曾戒其子無妄編綴作集，使後世嗤詆。今據陳之強原序所稱，知在嘉定時。安州守王允初等曾將二宋集合刊，但序內僅稱其言八十餘萬，未經析及卷數。祁本傳稱集百卷，藝文志則稱百五十卷。又有濡削一卷，刀筆集二十卷，已與本傳不符。其餘如范鎮所作神道碑，馬端臨通攷，則俱稱百五十卷。曾鞏隆平集，王偁東都事略，陳振孫書錄解題，及焦竑經籍志，則俱稱百卷。鄭樵通志則止稱七十八卷。唐庚序則稱二百卷。因集已失傳，記載互殊，莫詳孰是。陸游集又載祁詩有出麾小集，西州猥藁，蜀人任淵曾與黃庭堅陳無已二家同注。今亦不傳。近人所輯北宋小集，中有西

州猥襲一種。乃從成都文類、瀛奎律髓、文翰類選諸書採輯而成。非原本也。茲就永樂大典所載。蒼粹哀次。釐卷六十有二。雖未必盡還舊觀。然名章鉅製。諒可得十之七八矣。祁兄弟俱以文學名。當時號大宋小宋。其兄庠遺集已從永樂大典採綴成編。今祁集亦于蠹蝕之餘。得以復見于世。雖其文章足以自傳。實亦幸際聖朝表章遺佚。乃得晦而再顯。同邀乙夜之觀。其遭遇之奇。良亦非偶然矣。乾隆四十六年七月。恭校上。



# 清高宗題元憲景文集並各書其卷首

宋庠、宋祁兄弟同負盛名，且同舉進士。時以大小宋並稱，乃其官位一至宰輔，一爲尚書，事業所就既殊，情性亦奢儉各異。故其詩文沈博新警，因各隨其性之所近，而爲世所傳誦則同。及戒其子不令刊類文集行世，亦同。迨其後雖經合刊，繼而仍歸散佚。又同。茲復裒輯成集，並以聚珍版印而流傳之，又無弗同。其同不同之故，庠與祁固無能知之。余亦烏從而知之。然其散也，由于自欲韜晦，而其聚也，幸有永樂大典之僅存，佚之于七百餘年以前。宋天聖至今七百五十餘年而完之于三百餘年以後。明永樂至今三百七十餘年則又復歸于同。余因合題一詩，並冠于兩集簡首，更使之不同而同。則向之所謂同不同者，皆可勿深論，是之謂大同。

二宋合刊曾紀王。宋嘉定間郡守王允初倡議欲合刊二宋集以屬郡文學。陳之強未就而去。其後太守陳芾捐資刊成之。見之強序。惜哉分集失傳，詳學如有本終難晦行，不負言久益彰。伯也孤風，標雅操，仲兮強識富文章。雖稱儉過及奢過，弗愧元方與季方。收拾碎珍得全冊，吟題七字冠前行。休嗤大典紛割裂，愛禮幸茲存餽羊。





## 原序

仁廟初，號人物全盛時。而尙書與其兄鄭公，以文章擅名天下。其後鄭公作宰相，以事業顯于時。而尙書獨不至大用，徘徊掖垣，十數年間，故其文時多奇特。兄弟于字學至深，故其文多奇字。讀者往往不識，其將歿世，又命其子慎無刊類文集，故甚秘而不傳于世。元符二年，其子袁臣爲利路轉運判官，予典獄益昌，始得尙書所爲文，讀之粲然。東坡所謂字字照纖素，詎不信哉。文集二百卷，予得九十九卷，其餘云在曾子開家。袁臣謂予，他日當取之，并以授予云。唐庚序。





## 原序

荆湖之間，國朝以來，安州爲望都，名公鉅卿相繼而出。元憲景文宋公伯仲，則其傑也。昔太守今右司李公揆，繪其像而立之祠，逮之強之來請于郡，而春秋致祭，亦可以夸示後學矣。然宋公之典刑雖在，而文集不傳于鄉郡，謂之闕典。寓公李令尹之家舊有繕本，太守今都運王公允初，昔爲通守，每與之強言，欲借而刊之，未能逮持節京西，于其行，以帑藏之餘幾千緡，屬之強與之錢，本以廣其傳，又分數冊以往，將以速其就也。然攷之二集，旣富且贍，其言八十餘萬，工以字計，爲錢幾四百萬，米以石計，百有二十，他費不預焉。之強懼其難成也，而白之太守陳公芾，公一聞之，欣然謂之強曰：是亦予志也。郡當瘡痍之後，雖賑恤施予，日不暇給，然亦當輟他費以成之。二公政事文章兩極其至，故能于倥傯艱難之際，而爲粉飾治具之舉，其與蓄財而不知予，妄費而不知用者，豈不大有逕庭耶？之強深有感焉，因其成也，書之篇首，以告來者。若夫贊元憲景文之鉅篇大作，則有國史在，于前輩之鋪張揚厲而爲之序，則之強晚生，不敢措辭。觀是集者，自當知所敬歎。今之序，姑記其文集之傳云爾。嘉定二禩三月上澣，郡文學陳之強序。

〔案〕此序已載元憲集，因係合刊二宋文集之序，故并載于此。



# 景文集目錄

## 卷一

賦六首

## 卷二

賦十五首

## 卷三

賦十三首

## 卷四

賦十一首

## 卷五

風雅體詩三首

## 卷六

五言古詩三十八首

五言古詩三十七首

景文集 目錄

卷七

五言古詩三十六首

七言古詩十一首

卷八

五言律詩九十五首

卷九

五言律詩八十首

卷十

五言律詩八十七首

卷十一

五言律詩七十六首

卷十二

五言律詩七十二首

卷十三

七言律詩六十六首

卷十四

七言律詩六十三首

卷十五

七言律詩六十一首

卷十六

七言律詩六十首

卷十七

七言律詩六十三首

卷十八

七言律詩六十九首

卷十九

五言長律三十五首

卷二十

五言長律四十三首

卷二十一

五言長律三十八首

七言長律二首

卷二十二

五言絕句八十一首

卷二十三

七言絕句一百一首

卷二十四

七言絕句八十五首

春帖子詞三十八首

卷二十五

奏疏六首

卷二十六

奏疏九首

卷二十七

奏疏七首



卷二十八

奏疏十二首

卷二十九

奏疏十三首

卷三十

奏狀三十二首

卷三十一

外制四十一首

卷三十二

內制二十四首

卷三十三

內制四十四首

卷三十四

頌五首

景文集 目錄

內制十三首

景文集 目錄

卷三十五

頌五首

卷三十六

表十八首

卷三十七

表十四首

卷三十八

表十二首

卷三十九

表十八首

卷四十

表十七首

卷四十一

表十八首

卷四十二

議四首

卷四十三

議八首

卷四十四

論二首

卷四十五

序十四首

卷四十六

記十五首

卷四十七

贊六十三首

卷四十八

說四首

論二首

對一首

景文集 目錄

述一首

題辭一首

戒一首

祝文十九首

祭文一首

卷四十九

書四十三首

卷五十

書二十三首

卷五十一

書四十九首

卷五十二

啓三十七首

卷五十三

啓三十二首

卷五十四

啓四十一首

卷五十五

啓三十六首

卷五十六

啓三十三首

卷五十七

碑五首

卷五十八

誌銘七首

卷五十九

誌銘八首

卷六十

誌銘九首

卷六十一

景文集

目錄

景文集

目錄

行狀四首

卷六十二

行狀四首

# 景文集卷一

宋 宋 祁撰

## 賦

### 園丘賦

若夫天地之區。既奧而腴。王者所以作京焉。神明之隩。匪攻而築。上帝所以定位焉。我朝之擁歸運也。譏函鎬保界之陋。鄙周維渟濬之淵。乃據梁之芒芒。偵河之渾渾。畫邦畿之千里。于以宅天子之尊。然後翼翼乾乾。作邦孚先。禘其祖之所自出兮。遂有事乎昊天。占國南之七里。得高丘之岷然。自乾寓之初闢。保坤靈而不遷。藏偉兆于遐葉。震元符于茲年。此烈祖所以哀神之對。神宗所以旅物之蠲。真考之所陟降。丕后之所周旋。藹列聖以承衍。總萬靈而賓延。翁降監之厚福。焯巍巍而亡原。則晉攷卜乎委粟。漢胙饗乎甘泉。曾不得望我之末光絕炎。況竝軀而齊肩哉。敢問園丘之狀也。其何如矣。廣矣大矣。略可詳矣。上崔嵬以鬱律兮。外博敞而神麗。迺朱鳥以高蟠兮。概瑤魁而裘峙。休氣回復乎其椒兮。榮泉滋滲乎其趾。魍魎不若泯伏于其遠兮。神明肅然離衛乎其邇。于是攘之辟之。其蓄其翳。修之平之。其坎其囁。上三陔以積高。外四門而疏陸。列道糊賴。重營界紫。無縮版以作勞。不藉廚而昭侈。因天質之自然。非人力之攸

致。峯兮似高山之在周邦。巖焉若隆厓之亘汾漳。及夫涓日肇祀于郊之宮。陶匏尙質。金石有容。璧奠緝以蒼蒼兮。鼎歆雲而隆隆。百神服食。蔓衍乎坎閭兮。有司守燎粢爛乎壇中。稷穆天子相維辟公。咸盛氣以彊力。相升降兮穹崇。披大紫之莫莫。招翠黃之雍雍。合蕭籥于欽崇。曳高燿乎璇穹。塞天淵以隕祉。奮光明于無窮。竣乎主事。罔有不恭。若乃自內出者。無匹不行。自外至者。無主不止。故我率乎祖而推本。正乎位而升配。使禮動乎上。則神饗。樂交乎下。而人喜。畢九州以獻力。罄一純以盡意。君子曰。觀天下之物。無以稱其德。所以因天事。天取至誠爲貴。則斯丘也。實國家集福之清場。事神之寶時。國聽之所憑。靈心之所翔會。駐魄寶于臙歛。黃黃圖之方志。彼草樓列仙之館。像設梵王之廬。豚蹄種祠之託。鱗長九淵之居。皆祠官之細。祀族之餘。尙且落成者。鼓吻而極嘆。乞靈者。珥筆而爭書。叛宣父以語怪。溺丘明之好巫。獨圓丘歸而遺美。寧儒者佞僂而未之思歟。遂作頌曰。屹圓壇。赫圉圉。大盤盤兮。君之升。帝是饗。鞏而安兮。禮無違。福不回。委如山兮。聖繼聖。萬斯年。長監觀兮。

陳州瑞麥賦并表

臣某言。伏以厥田惟上。界王國之右藩。以穀俱來。告我牟之紀瑞。事昭邦緯。美溢農書。恭惟皇帝陛下。茂擁蕃祺。恪經善物。弄漢田而勸嗇。揉神末以訓勤。扈有九官。務盡耕耘之法。地雜五種。深防水旱之虞。屢敕攸司。勸登宿麥。至誠上達。嘉氣下翔。發爲兩岐。告成八政。田祖有神而從應。守邦作繪以來圖。庀穗孔



蕃天心爲豫。並詔儒館。交採頌章。良史必書。無謝歸禾之命。升歌大備。遂高多稔之詩。臣位屬冗閒。辭流澹訥。隔從臣之品。無預奏囊。效遊童之謠。亦均嬉壤。冒聞黼几。集懼嚴淵。謹夙夜齋戒。撰成陳州瑞麥賦一首。隨表上進。賦曰。

冠三輔之上者。莫邇于陳。接五穀之乏者。孰先于麥。當乘離之令序。挺降難之瑞殖。盛氣雲鬱。混鱗隔之初霽。密穗金繁。動星田之霽色。兩岐旁秀。六穗牙出。厥華芄芄。厥穎栗栗。田峻奔告。守臣駭觀。乍來以圖。悉上送官。他穀弗書。視麥禾之最重。吾王攸助。知稼穡之惟艱。洙北爰采。罔劬乎力農。關中益種。無聞于錫祉。詎若天極歸睨。明神效異。偕蕃椒之盈升。配命禾而合穗。迎層宙之仁氣。冠中田之嘉穀。繪我于瑞圖。辨我于凡菽。蒙至尊之渥惠。播新聲于絃次。上可以薦清廟之馨品。下可以助外甕之食劑。

皇帝後苑燕射賦

并表序〔案〕仁宗本紀不載後苑燕射事。此賦首云執徐統歲。當是天聖六年。祁改國子監時上。

臣祁言。伏聞今月九日。幸後苑。詔宗室。賜宴射弓者。氣肅商旻。神清漢籟。展懿親而合宴。講王射以侑歡。常武是經。良辰飾喜。恭惟皇帝陛下。靖嘉民極。勤訓道樞。鈞衆志以惟精。又永圖而無逸。夾輔蕃屏。立愛于周親。夏屋權輿。示慈于鎬飲。乘九秋之盛集。修六耦之帝容。終日射侯。不出正而命中。嘉賓式燕。實厥篚以奉將。洽公姓之樂胥。竦臣鄰之詠嘆。多儀有煥。在古罕偕。臣位屬冗閒。業專講肄。久陶景化。竊耳大猷。敢萌誦聖之心。仰企強名之作。感緣中發。雖極杼于四支。音以叩煩。更增羞于五降。謹夙夜齋戒。撰成

皇帝後苑燕射賦一首。繕寫隨表上進。

臣聞義圖肇畫。諸睽取星弧之象。周文彌郁。大樂著天駟之節。諒以四方爲志。本男子之事。一張作武。震王者之威。自秦制專私。漢道云雜。徒存燕射之舊禮。罕聞明辟之親御。惟魏祖政南皮之野。一日射雉。獲六十三頭。史筆詫其妙。文成避靈丘之區。仰山發矢。高四百餘丈。琰刻旌其處。是皆殊絕之詭遇。本非揖讓之多儀。據其善經。後我嘉會。恭惟皇帝陛下。膺載周之陳錫。紹放唐之丕律。高拱巖廊之上。丕冒環海之表。百執之駿奔走。無或曠官。四方之大和會。不知何力。于是外朝夙退。杪秋告豐。慶重合之陽名。申式邀之夏具。披虎落之囿。會麟定之親。始講射侯之容。將明潔鯁之禮。若其天威粹健。帝表胖正。雕弓栗筈。儼若有容。棲鶴畫正。砒然命中。歡聲回商。琯之肅。餘勁助霜。旻之高。宗室奉觴。以次稱壽。僉謂天挺其武。所以輔文之緝。事本于禮。所以綴樂之諧。蓋陛下財成大猷。冠卓千古。是而弗紀。有司之過也。夫言以文遠。功由賦宣。不有作者。將何述焉。其詞曰。

執徐統歲。少皞司秋。月著授衣之令。日紀吹花之游。僊盤露變。神闕雲浮。田峻告茨梁之獲。鄉童啓豫助之謳。上乃留囑良辰。載懷茂苑。呼蹕複道。回輿帳殿。望葱鬱于麟輶。披陰岑于虎囿。踰鳳遙遡。相鳥細轉。涼翠下長楊之宮。暝紫入棠梨之館。千門洞接。九幄霞連。周邦則伯叔之懿。漢家則肺腑之賢。相趨規地。雜筵瓊筵。儼飛綏而交引。森委珮而凝錯。川醪溢汎。騎炙紛傳。湛其露而在草。需有雲而上天。先是司射

謹官梓人庀具飾虎進侯張狸設步上幹下幹之交維三乏三正之並樹排崇旌以虹拖畫廣棚而雲布并夾竝儲決拾相旅我物孔揚我儀用光刻矢薦于夏簞彫弓出于扶桑彩五施而列暈歌九節而升堂萬乘來御羣心樂康弦隨月上弓與天張姬周則多材之主湯乙乃甚武之王有翼有嚴不懸不棘舍拔則拱應弦而中主皮割其已徹勁羽飲而猶動駭踐烏于日域震封狼于星塚彼藝有六徒得乎刻注參連我善兼五不專乎興舞和頌掩前辟以賣名表上天之錫勇于是皇襟兌悅協氣雲蒸少府之賜錢流地庖人之割肉如陵示慈則折節加俎式宴則鼓瑟吹笙軒霞蕃后磐石宗英美發的之希代咸奉觴而造庭似雕澤之翔振鷺若辰居之環列星原夫射之爲義是謂觀禮外則審固而正躬內則雍容而釋志支左詘右之能項發口縱之異或合宴序賓或算多與祭公用隼而射墉觀如牆而揚觶中則得爲諸侯爭有似乎君子然特人臣之善容未識我皇之射意若夫修五常爲弓矯百度爲矢總黎獻以樹的罄綿區而除位參天地之控引順陰陽而張弛一發則英雄在殼虛撫則蠻夷斷臂豈徒鵠爲小鳥取難中之名騶曰仁獸樂庶官之備而已哉是日太師閱樂酒正徹觴辰旋回指歸于未央

上苑牡丹賦

并序  
〔寄〕  
〔爲〕  
〔國〕  
〔子〕  
〔監〕  
〔直〕  
〔講〕  
〔時〕  
〔上〕  
〔聖〕  
〔七〕  
〔年〕

臣聞天以蓋高爲質不待言以達意物以非常爲感不擇物而效端故日月得之爲見象草木得之爲鴻英堯則蓂草蒨陛陞陟漢則玉芝秀池霑桃天美室家之盛蓼蕭著王澤之廣託寓雖細既施甚明聖上即

位之七年春三月內苑出牡丹三種特異常卉其一雙頭并幹其二千葉一房其三二花攢萼附足甚大  
葩色正紅蓋上帝博臨之都休精回復之地襲百昌以挺出震殊應而沓臻聖上美茲嘉生載延容賞有  
詔侍從咸俾陳篇良以天瑞來皇襟豫物宜遂頌聲作其崇丘行華之比乎都荔桂華之儔乎下臣無庸  
竊耳嘉致飾是蹈舞永爲文詞不敢預枚臯之倫庶將備適人之採賦曰

夫何牡丹之挺育冠羣葩以擅奇歷上古而隱景逮中世而揚蕤桐君之錄兮曾莫余毒謝客之詠兮蓋  
殊爾知有隋種藝之書疎略而未載子華繪素之筆髣髴而傳疑蓋神明其德故隱顯從時昔也始來由  
皇唐之綴賞今而薦瑞後我宋之重熙徒觀夫強幹深根交柯委質賦理內滋今容橫出材無用兮不取  
美于匠曰子非甘兮不見傷于口實懷香馥郁結蔭葱密讓衆卉之先榮燦靈華而後出解苞星布丹艷  
霞蔚雜雙行之重錦銜已文之兩翮挹仙掌之承露迺咸池之浴日莫不玩之者怡神攬之者蠲疾彼苟  
藥萱草之凡材穠李標梅之俗物杜若騷人蘭香燕姑曾不得齒其徒隸況與之論其甲乙哉于是圭窵  
密清瑞殖欣榮翠華雷豫清蹕天行眷大造之脗合慶神物之財成粵雙跗之特異與合榦而同名爲貴  
于多何如千葉莫斯爲盛誰比三英信夫顧神縣以隕祉戛珍坤而炳靈匪一花之取貴蓋萬物之厚生  
于是宸囑灑然羣心樂只詔從蒙以均賞肆詩風而飾喜且其鋪觀往圖各祛茂祉胡不出于下土而出  
乎京師胡不萃于異品而鍾乎花卉臣愚不識請占之天意若曰雙頭者兩宮之應同德之象馨香升聞

億兆攸仰。千葉者。卽年之數。永命所基。宜爾子孫。以大本支。三花者。品物盛多。黎庶蕃廡。德宇宏被。恩腴周普。有一于此。尚可咤丕應。奮終古。況凝屑吳之協氣。萃上林之斂樹。重葩疊葉。凝丹絢素。邇顯若之龍顏。間遶然之鳳羽。亦由芝房之唱。升漢之郊廟。桃花之行。著唐之樂府。上方執沖德。合鴻猷。特以人瑞爲應。不以物瑞爲尤。則是花也。聊可玩于耳目。故雖休而勿休。

皇太后躬謁清廟賦

并表  
〔案〕仁宗本紀。謁廟時。祔直史館。在明道二年。

臣某言。伏以遙追孝者。雅人歌其匪棘。能事神者。書筴美其多材。況祇款廟祧。哀對宗禰。宣治馨而有飮。恍愴嘆以如聞。從昔所難。乃今具舉。恭惟皇太后陛下。至仁兼愛。柔道體元。保育長君。就成聖德。出入一紀。鞏固萬樞。黎苗偃化。則澤從雲游。殊鄰結好。則倚若天等。三光儲發斂之度。百物遂零茂之宜。且念措多方之治平。皆眞考之遺法。成功不薦。審訓謂何。亟詔攸司。屬新圖禮。躬按天飛之馭。並會月游之庭。萬羽蹈揚。禕章參亞。逮晏朝而已事。因列聖以居歆。薰然至和。入金匏而成象。錫之多福。寒穹壤以無垠。臣屬在陪祠。職當汗簡。輕率斐狂之思。少裨舞歎之餘。敢露懽悰。自忘樸學。謹夙夜齋沐。撰成皇太后躬謁清廟賦一首。干瀆宸覽。

聞夫祀以息民。王假有廟。昔人美而稱之。殊不知。棗盛之香。所恃者昭德。祝史之薦。不愧者信辭。濟濟非盡志之貌。翼翼爲多福之基。然未有祓精意。燁鴻儀。仰瞻丹楹。則禘而後獻。俯奠嘉玉。則告而不祈。非聖

后之有作。疇能出千古而豐規哉。於皇齊聖。紹天葆命。佑育我長君。財成我庶政。十有一年。綿區底定。且曰。予惟膺真廟之託。耿列聖之光。投艱夙夜。罔或怠遑。幸三邊無誰何之警。萬物躋仁壽之場。若使功成不告。則春秋祇事。無以奉承審訓。而享我先王。丕顯明辟。孝愛兼極。將順德音。爰告方國。列保廕于親慈。諄勤勞于聖職。粵若朝多吉士。位靡瘳官。乃承乃弼。爲屏爲翰。薪有芄棫。河無伐檀。此則聖后備陶姚則哲之難也。清問下民。哀矜庶獄。興列化條。恢疏網目。杜其牙角。保我墉屋。此則聖后有成康措刑之速也。每歲命使。繼好龍庭。幘輻相銜。厥角相平。罔投以餌。罔繫以纓。此則聖后保漢宣撫和之盟也。能仁精廕。聖仙福地。有種于祠。有款于類。莫不發少府之藏。賁萬楹之麗。此則聖后奉唐家戒禧之至也。恭則易優。儉斯少欲。金玉不釐于上方之器。纂組不麗于三宮之服。別苑無從禽。離宮無改築。此則聖后守黃老清靜之躅也。至于熙百志。又萬樞。粹與天謀。沖與道俱。朝夫听而晰燎。夜已乙而觀書。尙且勤勞勵翼。輯闕衰而按羅圖。是以長樂之記。彤管之史。休功懿績。紛綸填委。雖巧勞與智憂。邈無階而勝紀。是宜格祖謝成。有齋恤祀。答在天之丕覆。擁如山之祕祉。于是方岳投頌。臣鄰肄儀。增蔽旒于法冕。加緝采于緯衣。皆宸心之參定。掩前聖之未思。乃以仲春吉日。曳九旗。參六螭。雲罕前導。王軼下馳。義和掃霞。以登照雨。師沈景而藏霏。攸徂之民。注耳傾目者。以萬計。惟恐屬車之行遲。寶輅徐動。雲簾四垂。翟菲馳乘。次于雞翹之省。莫不穆穆肅肅。按周道而翳華芝。有血閭宮。光昭帝容。百工如繡。廣樂成宮。阻芝英以自潔。秉葵

首而有融。鑿刀鑿然。刑麗牲以升几。王瓚觶爾。滿明水而雨空。邊豆惟旅。鋤耄相從。徧七室以沃灌。罄一德而虔恭。星妃備亞獻之列。月后謹三酌之容。二告交答。萬祥來同。然而歸蕃釐于嗣帝。讓懿鑠乎祖宗。是以祕祝私請。無一當于聖躬。寧不謂慮危以安。保盈以冲。雖古之任姒馬鄧。區區述美。曾不足踵武而齊風。樂閔禮成。回輿而歸。天子乃肇率籲之固請。建丕稱而揚徽。拜奉瓊冊。內薦椒闈。上公旒節以焜照。羣臣冠劍而陸離。遂鴻名于茂實。儼天極之巍巍。已事而詔曰。我之此行。務達至誠。不豐于昵。不有其名。惟齋心以交肸鬯。惟合漠以侑神明。然重勞百執之庀事。聊第賜于公卿。若夫策勳舍爵。茲事體大。則候夫皇帝之躬耕。

右史院蒲桃賦有序

癸酉之仲夏。予受詔修書。寓于右史院。紬繹多暇。裴回堂除。有蒲桃一本。延蔓疎瘠。垂實甚寡。予且玩且惜。以爲省戶凝切。禁廷敞閒。人不夭摧。禽不栖喙。與平原槁壤有間。匪灌漑宿莽所干。而條悴葉芸。不爲時珍。何耶。得非地以所宜爲安。根以屢徙爲危。封殖浸灌。信美非願。因爲小賦。代其臆對云。

昔炎漢之遣使。道西域而始通。得蒲桃之異種。偕苜蓿以來東。矜所從以至遠。遂徧植乎離宮。去葱雪之寒鄉。託崑崙之福地。並萬寶以均載。歷千古而舒粹。玩之可使蠲煩食之足以平志。不由甘而取壤。迺因少而獲貴。鄙柚包之輕佻。賤蔗境之塵滓。粵何人斯。殖我于茲。託深嚴之祕署。切轆轤之文棖。培孤莖以

膏壤引柔蔓乎標枝。泉石渠以蒙浸。露金莖而泫滋。布涼影于月宮。獵重葩于禁飈。蔽周廡之岑寂。隱肅唱而透遲。彼得地而逢辰。宜欣欣以茂遂。奚敷華而委質。反慘慘而茲瘁。乏磊砢于當年。讓紛華于此世。是必野荻非層掖之玩。非實異太官之味。困枳橘之屢遷。嘆匏瓜之徒繫。亦猶鬱柳有性。不願栝樅之華。海鳥取容。非榮觴酒之饋。胡不放之巖際。歸之壟陰。上敷榮于樛木。外結庇于緇林。蒙煙沐霧。跨野彌岑。豐茸大德之谷。栖息無機之禽。保深根以庇本。誠繁實之披心。窮天年以善育。奚斤斧之可尋。亂曰。階藥銜華。堂萱爭麗。枝以萬年爲名。木以五衢稱瑞。是皆託中涓以進藝。荷鈎盾之爲地。結實心以自如。非孤生之所冀。



## 景文集卷二

### 賦

#### 古瓦硯賦

有知己者。賜予以古瓦硯一枚。溫潤可嘉。寶玩無斁。感物銘惠。因爲賦之。其詞曰。  
粵有雅器。以硯爲證。本瓴瓦之微物。荷坯陶之洪施。嗟興廢之靡常。念終始而殊致。昔何爲而湮沒。今何爲而見異。得非大廈雲構。飛薨山峙。凌霧概日。橫鄴蔽里。宮窵篠而相屬。闕觚稜而叢倚。敝金谷之爲樓。會叢臺而成市。莫不狀翠鱗而隱軫。浮青煙而旖旎。陽鳥結阿以上承。玉女飛牕而下視。忽代往而棟撓。俄人非而室燬。遇昆陽之飛屋。逢霍家之微第。化魏宮之鴛翼。災柏梁之魚尾。于是星墜冰散。光沈物遷。狼籍舊圃。沉埋野田。失蚪檐之瑞色。掩銅雷之餘鮮。朽壤晦兮何日。縹苔封兮幾年。或深耕而出壠。或被發而常阡。詎毀方之可冀。甘勝注之長捐。何智者之省會。爛奇姿之下顛。感無情之舊物。將有用於羣賢。爰究爰度。載磨載鐫。因其窳以爲受。卽其陋而成研。我質具矣。幽光粲然。純漆倖黑。潤珉訂堅。謝泥塗之幽處。升文史之長筵。或兔穎而前試。或雞距而相鮮。荷提攜于手澤。涵文飾于言泉。若乃尼父作經。太沖能賦。伯英臨池。王充置柱。君苗未之焚棄。范喬見而悲撫。雖寶肆之非齒。幸哲人之攸御。靡頂至踵兮墨。

之徒將效勤于斯語。

臥廬悲秋賦

澤國秋早。霄垠夜涼。孤雲度隴。流水周堂。楸兼柳以同晚。李與桃而代僵。初收白羽。尙展流黃。城上星殘。鳥八九而生子。林間露滴。鵲十五以成行。有客伊何。于茲戾止。左思洛中之僧父。蕭育杜陵之男子。濫簪幕廷。寧磨楯鼻。昧狗曲之禮歌。陋雞棲之車柅。結課歲殿。勞形日悴。銜箋數以未容。給侏儒而幾死。江淹本恨。朱玉多悲。撫彫年之易晚。嗟芳物之行衰。箕風撼以生字。娥月皓而侵帷。寥寥鴈引。嘒嘒蟬嘶。壯士抱翻車之嘆。長年有落木之悲。況乃鞅掌孤官。棲遲下館。市門違詣于刺繡。冰氏見排于挾炭。根同江北之移。病比漳濱之竄。惜惜臂肉。已先家令之銷。種種顛毛。弗翅齊人之短。感鵲鳩之妬芳。對鷄雞之中旦。本無情于時遇。誤策名于王府。謝胥臣之多聞。有倪寬之儒武。感慨中發。驅馳自許。凝綵采于蔽翳。憂正聲于韶護。均捶鈎之重輕。督絲繩之規矩。暴皜皜于秋陽。抗啗啗于風雨。顧有志于佐時。惜無津而事主。令伯之內轉難期。盛憲之多憂有素。翫瑤草之變衰。恐蛾眉之遲暮。豈知孤臣弔影。客子迴腸。心隨波蕩。愁並斛量。數日惡生。感離情于太傅。二毛颯變。動歸興于中郎。緇素非五丈之速。舒喙無三尺之長。願寫情而復獲。徒掩袂而浪浪。

感交賦

并序  
〔案〕賦係真宗天禧四年。祔在安陸時作。

夫浚井冽泉物之利也。甘至而先竭。芳膏煎蘭用之美也。明極而自銷。信哉是言。吾見于太原王生矣。生名賀。字贊堯。其先太原人也。襟度冲粹。風規凝簡。左右就養。慕嬰戲以爲娛。卓犖觀書。恥章雕而習巧。學殖滋大。聲譽駛馳。由是四充賦于賓賢。一奏御于宸覽。引商之曲。始寡和而攸稱。躍冶之金。終不祥而見棄。而君曾靡屑慮。嘖無尤言。仁不中而反求。氣至剛而無害。怡處宮畝。坐進道腴。旣閑且馳。水曲之靈有節。不怨勝已。嵇山之箭乃深。天禧元祀。予以父怙纏悲。窮閭削迹。企人室而孔邇。卜親鄰而有初。而君不我遐遺。惠然肯顧。切偲之義彌篤。簪盍之情在茲。乃至刪切藝文。推朋友契。分山霧之餘潤。襲臯蘭之一薰。恩斯勤斯。或推或挽。俾恣煩之有賴。非哲父而疇依。而君姿素質羸。少小多病。過鄭吟之三歲。甚漳臥之十旬。越明年春。食劑愆和。豎膏遘疾。重繭下冰而已。甚邪風造熱而迭攻。六氣之沴交臻。九折之醫靡效。革帶移眼。悵仙骨之悵悵。葆髮悲秋。惕餘陰之奄奄。一日。予往候其疾。生舉手而言曰。吾殆將死矣。胷臆結轡。氣血周僨。楚魂外散。蜀肺中焦。自茲恐不得復見。因泣下數行。夏四月。卒。年三十有七。行路與歎。朋遊隕泣。齋志沒地。馮生之恨何窮。積憂傷人。盛憲之年不永。直念古者。異世同悲。謹按君雅行素隆。華胄相繼。高節應世。暴秋陽而不渝。奧思際天。恥聲悅而增飾。雅善談理。素樂名教。執雕虎之疏賤。未嘗動心。視龍斷之富貴。介然不屈。加以累世清白。四壁徒立。北堂垂喜懼之歲。東陬乏膏腴之產。而君夷險一致。欣然忘貧。范雲之室無姬姜。令伯之晚有兒息。逮夫議圍失利。綿病相乘。霞朝霧夕之沈歡。苑雪臺風。

之悵別。醒憂滄委。強壽弗延。况兮鬼伯之來催。偃然石室而長寢。美志弗遂。永懷李廣之數奇。遺文頗多。當類偉長之不朽。人之云謝。今也其亡。先是君娶范氏。末年生子。未百日而君沒。范既早寡。擁樹而歸。庚申歲。予南涉大江。戾止斯郡。訪君之孫。已三歲矣。天骨特異。童游不雜。諒夫善慶之所積。宜其孝謹之不衰。貌是若人。庶乎必復。墓木將拱。州來之歎。曷勝。青簡尙新。秣陵之言永已。追爲此賦。式用寄懷。敢同劉峻之廣交。聊代山陽之感舊。收紙長想。屬思不文。其詞曰。

惟天地之肖貌。鍾象數之最靈。幹五行而宅秀。攬萬物以儲精。粵亭會之脗合。倬思皇而挺生。聯秀驥以服輓。筵儀鳳而舞庭。藹媚天之吉士。煥入彀之羣英。嗟若人之閒傑。何遭時之熙盛。裴淮水以啓胄。追汾陽而薄景。統三變之至道。凝四端之粹性。貌峩峩而突弁。衣襜褕而方領。馳妙譽于丘稷。掩多奇于汝穎。出乎類以拔萃。砥其言而礪行。軼士林以橫步。邈霄塗而高騁。直協華之啓旦。頒深詔而求治。嚮公車以千數。集橋門而萬計。莠菁莠而載育。薪翹翹而成刈。萃呦呦而鹿食。場皎皎而駒至。彼君子之修業。奉哀舉而論藝。馳一封之漢車。冠百朋之周士。紛采采之雪裳。謠譏譏之帷被。家抱玉以相矜。言盈庭而可畏。獨夫子之卓爾。憤愚儒之翕訾。決辯濤以四出。軒意霞而中起。盤百鈞而不跪。投千牛而彌銳。羣心惕以解體。衆口哇而瞠視。將一鼓以作氣。以十手之所指。塞登薦于王府。羣萬有而來泊。混如涇渭之合。雜若蜩螳之沸。或臘彈以勤請。或金膏而將意。惟夫子之介然。謂衆謀之非睦。合清唱而靡應。據中道而不倚。

惡登牆而棲處。恥畫墁而食志。苟爾功之可圖。非吾人之所履。企造天之華闕。爰奏技于嚴宸。皇不察予之中誠。汨旅退于下陳。無左右以爲助。雖隨和而孰珍。虎當關而逐逐。犬迎吠而信信。斂高足于要津。反初服于私門。宮一畝以卻掃。案三杯而食貧。雖埋照于流俗。愈抗情于曩真。庶桑榆之可收。奚嗜慾之足馴。咨余生之叢爾。昧賢達之高致。屬鉅創以集蓼。委頽齡而歸里。聲不高于鄉品。志方謀于遐尼。何夫君之淵識。外當世之流議。續伐木之高矩。締忘言之密契。始告導于忠善。終博約于文禮。義蓋高而薄雲。言志美而成市。霜雪零而靡凋。風雨晦而不已。尋越盟于戴笠。乏牙絃于流水。我有實而子採。爾有規而吾佩。期左提以右挈。俾盡善而又美。優聖域以襍裳。賓帝門而結軌。愍人生之多故。撫物化之靡常。何夫子之稟質。鬱中乾而外彊。廣十旬而寢疾。偃四支而在牀。餌惡石以無徵。指餘陰而激揚。鳥發識以入室。暨興妖而在盲。容壽母之垂老。撫孤孩而增傷。心念後而惴惴。淚垂睫而浪浪。啓手足以自顧。何命促而意長。慨朝露之漙至。入脩夜之不暘。嗟天理之繚然。云禍盈而佑吉。監至高而在下。網雖疎而實密。何夫君之重道。遭六極而生疾。收華藻于中春。頓遐蹤于逐日。昔二人之同心。今一臂而相失。望森森之美檟。歎蕭蕭之遙阡。豈死者之可作。徒興歎于九原。脫亭臯之珍木。淡隴首之長烟。日西匿以風戾。鴈南翔而露圓。仰泰素之收神。哀拱木而斂魂。瀝酒綿之薄奠。撫墳草之陳根。舊館閱以無覩。遺書散而罕存。投空文以長想。盡萬代其何言。

送將歸賦

錢祕閣  
李還臺

溯長波之齋潛。面屏幘之嶽崎。逗商飈之迅籟。土帽日之浮暉。問駕言其焉往。餞我友兮川湄。閔征夫之云邁。值彫年之行晏。花戢芬以去條。葉扶槁而違榦。氛曠曠其既興。露溥溥而復沍。切寒螬之暝唱。驚離鷗之晨嘯。塞祗役以偕歡。差感物而逢歎。于是行子輟艫。居人停轡。瑤軫徐泛。金舄參泊。判一笑于聯坐。結兩感于殊里。矧民生與代故。常回次而交戾。譬持筵以偶楹。寧有望于如志。甫論咫以希泰。俄較尋而得否。老超境以逐壯。憂涉域而追喜。苟外物之迭攻。歸吾衰其焉避。執子祛以遷延。耿子襟之淹卹。越層瀼以斜趨。薄深林而戰慄。虎號羣以擇肉。蛟流涎以尸室。美哲人之蒙險。方愛主而委質。視呂梁其安流。蹈太行猶通術。亟之帝兮樂胥。保玉體而逢吉。

歲云秋賦

予所悲兮胡獨悲。此凜秋時荏苒以就頽兮。年嶢嶢而行休。邈西顧之突遼兮。噫長風之颼颼。視天根之焯焯兮。湛寒潭之漉漉。漉既肅其早淒兮。霜又申以凝冷。號鳴蟲之夕韻兮。流腐燐之宵景。病晚馥于菊涯兮。委孤秀于蘭町。矧梧楸之脆根兮。與蒲柳之殘境。械芸黃以一概兮。攬吾懷之耿耿。懷耿耿其可奈兮。駭山西之日薄。無翻車之趨壯兮。氣黯黯而逾索。憑八垠以舒眺兮。嗟萬彙之摧斥。意忽忽爲慘端兮。襟浪浪爲愁宅。苟流節之不停兮。我安得美好之如昨。丹去顏以既易兮。縞尋領而胡亟。世無媒以求援。

兮言愈勤而理隔。憚信誓之未同兮。不察吾之中誠。歡期變以遷次兮。涕泣焉其流纓。離鴻劇其高飛兮。羈獸駭而長鳴。視河漢之傾斡兮。突浮雲而繁興。觸羣媚以自持兮。恐容華之坐零。雖坐零其胡卹兮。歲實爲之遲暮。秉直質以偶俗兮。如望朔而趨楚。挾蕙茝之神奇兮。固蒿藜之過沮。竭來兮。守故居。姑彷徨而容與。

窮愁賦

粵余生之不造兮。獨遭命之險艱。宜衡閭而伏處兮。撫隆墀而永歎。哀靈根之早逝兮。駭危喘之將殘。收離散之餘魄兮。倏嶢嶢之暮年。骨久病而支離兮。步數蹇而蹢躅。謝鼻掩而愈濁兮。蜀肺焦而益煩。紛種髮而弗理兮。叢黃馘而鮮歡。據惠梧而夕暝兮。頤侯釜而朝飧。衣適館而旣敝兮。屢履霜而又穿。欲正冠而巾析兮。乍僂腰而帶寬。身繫匏而待食兮。心溺灰而未燃。陋有子淵之巷。餽無考父之饘。乞播間而不足兮。病河上而相憐。魚躍躍以游釜兮。雀啾啾而在門。朋簪日以益衰兮。非強邈而罕存。候義馭以盆覆兮。俟江波而轍乾。出招懷以自失兮。入齋咨以含酸。乏載車之饋饌兮。罄使鬼之蚌錢。啓勞府以深悼兮。知茲路之良艱。被珍髢他計切以鬻戎兮。肅南轅而湊燕。搜反苦膠柱以鳴瑟兮。逆上坂而走丸。安鑿枘于齟齬兮。屈杞柳于杯圈。株有兔而猶待兮。木無魚而必緣。振宋苗以望歲兮。張越射而仰天。用于將而補履兮。采明珠而升山。求簡雲于紆驥兮。責重繭于紅蠶。顧物理之必殆兮。信余謀之所愆。胡捨屈而就直。

兮。曷抱方而遞圓。譬秀木之必伐兮。若芳膏之自煎。道與藝而交喪兮。諒何往而弗捐。慨周道之至廣兮。抱真懷而靡釋。追孤憤于韓子兮。嗣七哀于魏植。淪幽憂于莊篇兮。委牢愁于漢冊。笑一握而非樂兮。腸九回而皆極。慨既破而誰顧兮。井未繙而可惻。悞既往之遺譖兮。收方來之茂績。願荷戈而爲戍兮。抗戎索之遐封。值占雲之入貢兮。方鑄戟而務農。願殖貨而爲商兮。策鮮怒而流遁。嗟漢律之排賈兮。始抑末而返本。願採采以歸耕兮。輸春稅于民曹。吁四體之不勤兮。靡服晷而作勞。願執藝而爲工兮。備成器于元后。願百工之皆良兮。懼代斲而傷手。願退處于巖穴兮。與賓客而高謝。屬君子之正位兮。方小人之在野。願沉浮于閭里兮。揚聲詩而達志。遭天下之有道兮。故庶人之不議。攷所願之皆違兮。豈背時而爲累。稟有餘之潘拙兮。抱不足之臧智。委炎隆而弗附兮。甘沉冥而自已。羌倒行而良背兮。宜深屏而遠棄。據疾藜之困處兮。羞侏儒之飽死。入坎窞以掀淖兮。辱泥塗而攘臂。逢子山而生悲兮。值楊朱而拔淚。憤懷玉以握瑜兮。嘉佩蘭而襲芷。懼衆狙之怒目兮。混羣貍而垂耳。豈李廣之數奇兮。將孟軻之迂事。發素蘊以周咨兮。俟見仲于知己。苟戶塞而不開兮。信吾衰之久矣。亂曰。一瓢之空。吾未知其窮兮。萬錢之豐。吾不謂之通兮。濯我之纓。既遭時之清兮。整我之冠。以待人之彈兮。

傷賢賦并序

爲先友公孫子正作也。蓋子正官于太學八年。與予嘗僚者二歲。觀其爲人。事親孝。與士信。深中夷澹。毅



然持正。陽休德輝。見于顏間。難進而易其祿。急病而後于己。親之無令色。遠之無裏言。都中士大夫。走高門。趨下陳。無寒暑之避。與槐柳皆列者。蕩以成俗。而子正爲禮侯。官長初無造詣。居常著書。尤邃禮學。默而好深沉之思。神期數千載間。屬文而辭邇雅。臨帖而書臻妙。予嘗謂子正加于人一等矣。無鬼責。無人非。大易之懿文德。洪範之考終命。宜其享之。而祿不過上農。位不登二定。稟焉早世。命也奈何。矧無兒應門。有女未傅。斯亦生民之大窮者歟。子辱于締交。託在奔走。出均轡組。宴銜杯酒。信誓旦旦。要之白首。今又弱一箇焉。死生交情。俯仰陳迹。向之歡緒。今成悲端。嗚呼。天非裨竈之知。輔仁罔驗。命爲鬼伯之促。齋恨何窮。追爲助紼之詞。以代焚芝之感。

天生若人。好是懿德。左佩規而右矩。前陳繩而後墨。鑒玉水以論方。殫翠毛而取飾。席至珍之百沃。咀永味乎千臠。蒔固蒂于文林。鍵洪樞于聖域。澡重氛之耳目。棲灝氣乎骨髓。遭帝華之顯時。與多士而來思。掩輝山以待價。頓宏羅而見羈。士惟君養。爵乃吾縻。敏以越砥。御以新羈。入冑筵而鳴鼓。退私室而垂帷。或東觀以讎籍。或平臺而見師。或連螭第賦。或競病論詩。包左氏之富豔。無枚臯之詆欺。有冽匪泉。有直伊矢。蹇不撓于亮節。遂無言于臚仕。不諂笑以在畦。不處嫌而納履。年四十而介然。食九人而近止。彼君子之知命。方無愠而無喜。誤葉縣之好龍。歎山梁之拱雉。天難諶斯。皇肯照微。如何不淑。邦哲其萎。謁靈濤于鷺壑。傾怒翼于鵬池。況復顏徒非壽。伯道無兒。未嫁兮左思之女。獨拜兮任咸之妻。使積善之無報。

信至神之我歎。悽悽草長。寥寥露晞。熏蒿掩乎野土。神明濟乎天陲。對秣陵之舊簡。乏南楚之招辭。慟寢門而投賦。彼厚窆兮何知。

憫獨賦

憫前人之抗志兮。雖有適而途迷。恃我醒于皆醉兮。矜獨是于衆非。吾固知喬木不得林兮。孤音鮮與之諧。特立廢于曹跼兮。一妍掩于萬嬋。舉吾黨以同寐兮。挈予覺其何之。越家祝而訶冕兮。裸戶程而哂衣。奮單辭以正議兮。安足救輿談之參差。發介瞭之精覽兮。何預羣蒙之佞嬉。屈自高以赴淵兮。夷已信而餓薇。波潰流而無益兮。反蒙歡而被訾。今吾有道于此兮。請質古而瑩疑。狂者以不狂爲狂兮。飲泉流而後宜。非聖者以聖爲非兮。均獵較而免譏。挫爾方而殺廉兮。常偶欣而儷悲。保獨行以中晦兮。庶明哲而爲期。

詆仙賦

并序  
〔秦〕  
出知  
壽州在慶歷元年。

予旣守壽春。覽郡圖。得八公山。故老爭言。山上有車轍馬跡。是淮南王上賓之遺。耕者往往得金。云丹砂所化。可以療病。因取班固書。葛洪神仙二傳。合而質之。嗟乎。人之好奇而不責實也。尙矣。而洪又非愚無知者。猶憑浮證。僞況鄙人委巷語耶。作詆仙賦。

憫茲俗之鮮知兮。徇悠悠之妄陳。常牽奇以合怪兮。欲矜己以自神。操百世之實亡兮。唱千齡之僞存。彼

淮南之有子兮，固殊死而殞身。緣內篇之丕誕兮，眩南公之多聞。謂八人者語王兮，歷倒影而上賓。餌玉  
匕之神藥，託此軀乎霄晨。王負驕以弗虔兮，又見謫于列真。雖長年之彌億兮，屏帑偃而愈愆。葛傳云：仙  
安不葬，乃謫守郡。塞斯事之吾欺兮，聊反復乎遺言。號聖仙之靈稟兮，宜常監德而輔仁。不足察王之倨  
貴兮，遑引內于天門。已乃悟其非是兮，胡爲賞罰之紛紜。寧仙者之同惑兮，無以異乎常人。國爲墟而嗣  
絕兮，載遺惡而不泯。故里盛傳其遺金兮，證隄石之餘痕。武安隱語而前死兮，更生僞鑄以贖論。彼逞詐  
以罔時兮，宜自警于斯文。

石楠樹賦

并序〔案〕本傳：祁于天聖二年釋褐，  
爲復州軍事推官，賦當屬此時作。

子嘗被臺檄北走襄漢，襄漢問家樹石楠爲園池之玩。樹率高不過二三丈，柯葉婆娑如帷蓋然。惜其上  
國之遠，不能移植，竊用賦之以竢知己者。

彼美嘉木，生平漢濱。鑠純粹于天極，稟蕃殖于媼神。十雨流液，重雲輸津。結深根乎奧壤，奮秀體于熙春。  
爾其阿那扶疎，崑亭葱翠。枝相交，葉相植，不扶自直，拔乎其萃。翠帽森覆，仙幢凝峙。秀金枝之未燃，障青  
綾而半倚。長煙夜淒，零露晨委。激雄風而裊蕊，沸蒙泉而漱趾。荷亭育之大德，全婆娑之生意。乃有仲長  
廣宅，庾信小園。共忘樊柳，咸嗤樹萱。悅吾材之特異，掩羣卉以收妍。乃培乃植，載育載蕃。高臨反宇，近映  
開軒。均長松之受命，等穠李之無言。黠幄密，童童蓋圓。非同江北之枳化，不愧東家之樹完。至如合璧

早紅上弦晚白送密影于瑣牕薦翠霏于瑤席帶寒蛸之嘶鳴映翠禽之格磔王孫感芳草之思中婦休流黃之織拾藥未暇攀條更惜如爲兩樹認若箇于韓憑脫致一枝當贈行于越國故其爲世愛玩受天煦和煦條枚黛滋跗萼星布不戕杯棬不天斤斧嬌庶子之春華同韓宣之嘉樹不生于窮谷畏七年而未知不長于少原嗟錯薪之亂楚幸得諡于芳林獲庇根于中土嗟上國之絕遠憫孤生之薄祐六枳維平萬國三槐配于上公御史著中臺之柏大夫紀東岳之松顧弱質之雖陋冀賞心之一逢託陵阿之善養丐根柢之先容苟君子兮太願將老棄于山中

酈潭秋菊賦

采采佳菊生潭之涓託厚土之善養亦纖植之所宜乏淵幹之爲衛保深根以自持苒苒蕃葉纖纖縹枝歷青春以戢景觸素秋而揚蕤觀其密繭攢敷圓房四附英披夕風蒂裊朝霞揮碎金以炫條揉寶釵而綴纓燦兮萃林苑之螢焰煒兮舒夜池之鵲羽沿綠煙洶散蔓霜渚抱酩郁之幽香撫變衰之平楚竊同蘭草無人而自芳幸比豕苓得詩而爲主于是愈跗之徒居多暇日心玩其華手擷其實紉太清之祕方咨酈川之茂質乃可以輕身益氣可以延期蠲疾雖甘苦之種有二精盈之名不一而胡公餌焉享曼壽之永鍾繇奉焉助養生之術淵明垂賞于佳色之辰長房見佩于登高之日誠仙真之所玩匪吾人之輕悉也若乃宗臣名世駿嶽儲休君託股肱之體天與忠孝之侯惟載育之在旦藹祝延以相求矧靈卉之

可嘉助永年而是適。匪意車之興謗。越管背而忘憂。幸春期之可續。庶樂圃其長遊。

零雨被秋草賦

送刁鐸從  
宰青城

撫萬化之棼斂兮。憑八極而延伫。既悲秋之變衰兮。復迨天之陰雨。溯問關之長道。覽沆瀣之平楚。于時際海籠日。窮天寫霧。雲引暝以夕屯。風含悽而曉赴。乍滅岫以亡巒。或蔽林而失樹。陂漫漫以蒙紫。川汪汪而蕩素。然後散漫虛落。空濛阡陌。慘江離之馥銷。沍疎麻之寒滴。紛灌莽以蔽虧。邈亭臯而紆直。荆榛寒望。蘭茝無色。水寂寥以收潦。壤塗泥而反宅。盈百感之外至。注一情而中惻。爾乃客子被酒。投袂四顧。畏簡書之期會。問征夫以前路。雙鳧之舄兮。有客一鹿之車。今在御。結斗城之深戀。捐鈎梯以徑度。周道倭遲。我心西悲。種厝陰以慘切。惜此會之騷離。踐靈輅之有蕩。憫柯葉之相遠。難莫難于遠道。樂莫樂于新知。寧念東山有歎婦之句。淮南有王孫之詞。

憐竹賦

井序  
〔案〕宋史庠罷參政出守揚州。  
亦出守青州在慶歷元年五月。

始伯氏貳宰司。就甘泉坊韓王舊第居之。庭階閒敞。予因種竹以爲玩。明年伯氏典維揚。予守壽春。憐竹方茂而諉之。後人其能嗣予好以封殖者耶。作憐竹賦。

惟茲竹之冉冉。自林町而叢產。偶拙者之移蒔。丁故王之閒館。塢陰灌以披豁。野色悴而紛換。辭墟落之曠處。佐堂除之近玩。既根危以殖淺。又氣冒而埃漫。迫俗物之挈喧。屈天標之蕭散。余乃謹其培封。申以

闌護。惡草夷薙。寒泉浸注。晝熙熙以暴陽。夕團團而沐露。舒萌庇本。弭寒閔暑。斂衰態以就悅。擢新姿以違故。于是蕭疎檀欒。敷芳森萃。謝叢筍之餘素。懷圓筍之脩翠。葉舒碧以向榮。澤浮紺而呈美。朏月上而景還。宇風來而顙至。常虛心以自得。顧直質而少媚。雖蒙幸于軒檻。本無爭于華蘼。嘉逸民之有言。非一日之可無。予野情而偏愛。託此君以自娛。顧泛梗之屢徙。方去爾而索居。感嬋娟之甫盛。將披剪而爲虞。昔召公之至仁。舍小棠而攸茂。公已去而民愛。念蔽芾之勿伐。余恤躬以僅免。匪餘庇之能列。徒結尙而敦好。忱後人之我替。音鐵矧客士之疎瘠。且狡童之撞搥。幸不夭于此生。保歲晏之高節。

感蚬螭賦并序

蚬螭寒蟬也。孟秋乃鳴。其聲繁亮怨切。鳴中之尤悲者。凡物無意于感人。而人有情于感物。況僕長年少。悵所念非一。壯與運頽衰將歲還。撫時對物。自然招悵。遂爲之賦。

愴秋晏之序寥。眇羣物而流玩。伊勝鳴之始來。驚萬化之方晏。倏含唱而叢咽。俄曳音以凝曼。本無意于感時。奚有牽于累歎。諒細蟲之何知。託生意乎鴻造。披素殼于壤曼。齋紺質于林杪。內虛心以抱潔。外華綏以自表。踰纖足以徐進。整薄翼而輕矯。引長喝于霞昏。逗餘嘶于月曉。和別葉之飜翻。雜離禽之叫叫。彼張女之哀彈。與籠首之橫管。特破弦之往悲。矜加孔之新囀。雖投節以感慨。猶假手以交譁。顧寒蛸之清嘒。非取矜于外銜。其發無端。其終無羨。寫清腸以赴訴。有自然之悽怨。號涼颼于天垂。嘯委露于雲半。

矧吾人之云衰。撫光景之適駛。聆蕭瑟之實繁。悵搖落之方既。掩歡緒以餽欣。紉悲端以觸歎。況日月其不待。何功名之能冀。一傾耳于此時。胡自聊于晏歲。

僦驢賦并序

予見京都。但人多僦驢。自給驢之爲物。體玄而足駛。雖窮閭隘路。無不容焉。當其捷徑疾驅。雖堅車良馬。或不能逮。斯亦物之一能。顧致遠必敗耳。聊爲賦云。

伊驢之爲畜兮。本野人之所服。乏魁然之遠志。常蹉卑以蹈局。卑靡斬于屠房。秣不煩乎豐粟。匪任重以取材。姑邀時而競逐。其資易給。其習易宜。羈小取適。纓華弗施。被僦者之希直。投人乏以獻奇。候其剽飲之節。劫以鞭箠之威。捨大道之平蕩。抵邪徑之窮幘。紛如鳥散。駛若風馳。顧叢軀之云陋。謂高足之莫追。歷委巷而矜伎。負宵人以奮姿。苟跬步之速至。趣要津以爲期。昧緜力之將竭。不數年而後衰。睨華驥與大車。皆鏘鑾而肅軫。挾善馭以爲範。按中達而徐進。伊良士之攬轡。實志遐而遣近。彼汲汲于所求。謂不悟而效敏。忘百里之必蹶。尙長鳴以取雋。昔漢靈之作罵。貽史氏之深譏。由稟生之么麼。非驂勒之常儀。況夫錐刀課得。晷刻爭機。諒隘途之坎窖。方見閔于顛隤。





# 景文集卷三

賦

豐宜日中賦

豐尙光大  
宜照天下

豐大也。貴夫擊蒙。日實也。盛乎居中。攷卦體之至象。配陽精于上穹。二體迭昌。麗午躔而光大。六爻俱盛。協瑞景以昭融。聖人所以仰之。如日受之以豐者也。昔之作易也。妙探神幾。冥符心匠。離明乎下。震動而上。大道既備。微生斯暢。由是因豐體之甚盛。與日華之相尙。必稱其大。取羣彙之勿憂。必貴其中。欲萬靈之咸向。膺合精義。燦爲烈光。彼貫八象。此臨萬方。引繫表之幽奧。對天心之焜煌。動且有明。候允符于爲市。亨而可格。位必契于當王。且夫時得其隆。理據于會。景鑠不震。隱微何賴。是必取厥運行。比夫光大。故初九未至。獲有尙之譽。六五既正。受來章之泰。見斗見汰。二與三而迭凶。其藹其家。四及上而交害。則知豐自不盛。道乃致危。日之不正。照或有遺。故我包三極以備體。媿萬景而不歆。居幽者各安其所。晞光者罔失其宜。觀象惟明。式在無偏之際。玩占弗隱。雅當必襲之時。是則豐協于日者。見廣被之勤。日對于豐者。有宣精之妙。昭然物理。煥焉典要。我功甚大。不求餞谷之名。我化既敷。不取嵎夷之照。用能義周萬物。明暨八埏。辭存乎卦。象昭乎天。究神道以臨下。燦洪暉而在前。用以致刑。法平分于瑞采。推而尙大。符表

正于高躋。王者所以不建謀猷。慎守宗社。觀豐則澤寢于無外。宜日則明被于羣下。因一卦之義焉。見聖人之道也。

宥過無大賦

民罪之誤無大宜宥

過無故作。宥必有因。非緩獄于中典。蓋原情于庶民。事異刻深。宜屈一成之法。理當註誤。率從三赦之仁。於穆聖皇。撫寧四海。愼上世之明罰。清下民之多罪。刑小必重。以其惡而怙終。宥大必輕。以其善而能改。明德攸尚。深仁念茲。義或出于彼失。情非因于我欺。雖深文之具止。在降等以行之。慮有司之誤傳。中恩必速。顧智者之一失。屈法何疑。且夫法以防姦。過非有素。儻議事之一貫。則淫刑之可懼。在夫審克無爽。哀矜合度。賜縲或失。可明郎吏之非。書馬不全。足驗侍臣之誤。則知刑惟一體。事有萬殊。蓋情之無狀者。非民之失。文之徒備者。乃法之辜。所宜慮萬方之有罪。察一夫之嚮隅。宥誠我出。過亦誰無。比宣父之知仁。必于其黨。同漢文之贖罪。豈忍加誅。噫。欲正莫若去邪。欲利莫先除害。賴姦隱匿者。雖小吾不見其輕。失辭無簡者。雖繁吾不見其大。誠昭察于政條。乃兼該于理會。脅從罔治。但計惡于刑中。非意相干。悉恕情于度外。故得有宥在治。不愠不知。非厚誣而專意。成善貸以從宜。事偶出于忘遺。法誠可降。義稍干于深固。罰亦無私。異哉。獄貴簡孚。君惟精究。情不踰矩。政思從舊。致斯民之不偷。自哲王而獲宥。

百獸率舞賦

和樂之極生類馴感

物有異類。天含至和。嘉率獸之屢舞。見大韶之可歌。緩之斯來。化雄心于攫搏。偪而不懼。蹈餘韻以婆娑。稽古有虞。命夔典樂。奮德輝之溥大。鼓頌聲以優渥。蠢爾羣動。居然後覺。爾乃拊樂石之鎗鎗。感毛羣之濯濯。德音是蹈。非狼子之野心。應節孔馴。異羝羊之羸角。始其笙鏞序矣。金石陳之。律動風應。音生氣隨。蟠乎天地之大。滿乎坑谷之卑。將萬物之共逐。矧衆類之無知。宜乎擾我之原囿。樂我之堦。駒仁麟厚之儔。或羣或友。虎躍熊經之態。乍合乍離。樂善協恭。獸臣動色。謂夫氣同者。易以化達。類異者。難乎情得。何微畜以來擾。實聖功之偕極。連軒廝至。孰謂不知其音。騰躍龍驤。何煩請對以臆。則知樂之至也。不在乎鏗鏘迭作。在乎和鳴。獸之來也。不以其羈縻終篆。在乎厚生。我將陳盛德于八變。彼乃引雄姿于九成。深爪作鱗。似趨鳴簫之曲。跋胡蹇尾。如投拊石之聲。響若五絃之曲。未諧兩階之干。非借專撞鐘伐鼓之侈。務張瑟鳴球之器。流乎逸樂。昧諸性類。則毅然鬚勇。或走險以深潛。矍爾鹿超。雖頓纓而莫致。聖人是。以去樂之僞。存樂之真。吾諸于德。聲託于仁。故能化鬚鬚于不狘。應蹈厲而來馴。性不我違。等淵魚之並躍。和非外感。參儀鳳以同振。不如是。則安得標甚盛于典墳。貫太和于舒慘。齊首瞻日之肯泊。詭狀殊形之同感。儒有賦古之諷。今願升聞于帝覽。

好賢如緇衣賦

心好賢者  
同彼詩詠

賢之可慕。好莫如深。仰宣聖之垂教。譬緇衣而用心。嚮義無窮。極高山之至願。懷仁不已。均適館之餘音。

前典與稽。後人是蹈。伊吉士之咸在。懣我心之匪傲。將使動必立誠。久無易操。謂疾惡之甚。莫如巷伯之斷章。謂樂善之勤。孰首鄭風之篤好。可立非志。可親匪賢。在敷求而顯若。協詠歎以翹然。嘉迪吉之時。又冀龍光之日。宣獎以實行。同敵又改爲之語。樂其靡爵。等還子授粲之篇。況夫百度交修。器非可假。九德並事。任之或寡。必在推愛心以無倦。做長言而則寫。藹藹胥洎。美髦士之生焉。善善所欣。繼國人之宜者。异夫征吉之文存乎彙。相求之氣本于同。因君子之樂善。媿詩人之念功。至誠前定。丕續有融。側席諮謀。美若上卿之服。虛心與進。愛同一國之風。彼羔裘素絲。訂儉德之美。千旄良馬。諭樂告之旨。未若推善職之流詠。爲類能之至理。我實念此。賢將在彼。烝髦甚謹。顧改造以相諧。惠迪彌勤。與中章而酷似。故王者因其教典。列以民彝。靡之我爵。舉乎爾知。樂周國之多士。法武公之采詩。旌迺善人。妙斯謀之允濟。俟夫來哲。賦之席以攸宜。則有運遘右文。時丁作聖。育士類于至教。本言章于遺詠。願一附于芻蕘。爲之歌鄭。

志在春秋賦宣父之志  
因是成法

志假文表。事由教宣。攷彼信書之作。明乎素王之權。自顯惟微。舉二中而明歲。因初正未。包五始以承天。當其道闕東周。化興尼父時。不吾用。仁非爾輔。由是約史法于當世。尊禮經于下古。素蘊內發。道章遠取。立誠不昧。方祖述于唐虞。覃恩無邪。遂憲章于文武。志者孰爲。聖人之所之。欲成功于撥亂。非務麗于屬辭。筆靡藏弄。神無越思。隻字論褒。與山龍而並貴。一言示貶。將斧鉞以同施。莫不昭列異同。謹敷名器。賢

雖小不能遜其善。惡雖大無所容其僞。動不遺策。舉皆善類。親則諱而賢則諱。互寫精衷。聞異辭而見異辭。迴分深意。得非聖人之道也。達加乎民。聖人之志也。窮止乎身。故我憫王政之弗著。抗策書而有倫。文豈虛設。教將有因。桓廢書王。所以謹明乎罰。豹惟稱盜。所以彰判乎人。是則吾志所存。存乎三代之美。吾志所極。極乎萬物之理。然建乃至道。卽乎舊史。赴告以之不失。盟會爲之成紀。以宣盛德大業。以懼亂臣賊子。稱族舍族。見尊卑之不踰。傳信傳疑。示質文之有體。故得郊麟表應。斗玉告成。具四時而言備。大一統而化行。外略內詳。游夏之辭莫措。微顯志晦。隱桓之日咸明。異哉。肇述宏猷。敷施大業。旣黜周而拒亂。終授劉而抗法。宜乎繼志之文。貫百王而不乏。

上春蠶龜賦

春序之月  
先蠶龜物

政有圖始。天方發春。薦幽血以升器。蠶大龜而用神。割以全牲。表惟新而嗣歲。授于太史。將致用以前民。丕訓孔昭。攸司愼舉。周官則具載厥職。呂令則叶言其序。月有履端爲重。我乃詔乎官占。物有不襲爲靈。我用藏于君所。始也。斗建寅次。正符夏時。事藏其舊。謀詢乃疑。發居蔡以顯若。取卦筮而奉之。煥若塗丹。布十朋顯具體。滂焉流赭。浹三兆之靈姿。然後舉籒籒以見珍。總繹靈而罔越。死且不朽。神無恐歇。貴以天之神物。謹以王之正月。苟玩占于象數。式俾從長。旣取重于宗祧。何傷祀骨。及夫占人獻兆。董氏告虔。視高惟謹。食墨罔愆。告我猷而弗厭。蔽朕志而爲先。寧不由乞靈肇祀。謹始開年。牢禮初升。旣措廟堂之

上邦儀云展。遂居庭實之前。彼宮室用成。鼓鐘將震。咸重其事。必先其釁。未若我外列邦貴。中參寶鎮。春者蠢其生矣。冠四序以更端。釁者殺而神之。竦羣心而取信。故王者習祥不爽。納錫有經。登茲備物。赫我至靈。辰有主于勾芒。舊章惟謹。告不欺于僂句。穆卜攸寧。士有洽見典彝。博知名物。惟布和之在候。俾乞靈而罔拂。儼欲紬天下之幾微。冀鄭詹之一拂。

法施于民則祀賦

功被民譽  
長享常祀

法本垂教。祀惟報功。仰茂績之顯著。標祭典以欽崇。大德既昭。勒廟彝而朽。遺風可攷。歆飲食以無窮。稽古哲王。詳明深志。念先憲之丕冒。思隆名而廣被。由是尊以法教。陳于祀事。經邦體國。昔用之而有常。邀福乞靈。今奉之而不墜。蓋以德冠後世。功施兆民。風聲遂以遐布。禱祀從而丕泯。據洪閔于當來。死宜廟食。答大功于既往。凜若生人。莫不彰叙洪猷。協宜來譽。此垂法也。物賴其賜。彼崇祀也。民將有助。業成久大。禮亦蕃庶。棄爲稷而龍爲社。薦幣乃興。湯以寬而周以文。奉辭交著。法之備者名大。祀之豐者日長。奉我一德。安爾萬方。昔也禮樂政教之道備。今也玉帛犧牲之品詳。所以軒祖至誠。民百年而肯畏。重華盛德。世千祀以彌昌。且夫法之不施。雖威而易仰。祀之不永。雖恭而執享。必在著厥語言。炳夫圖像。立功立德。固咸秩于禮經。先聖先賢。率來思于大饗。异夫法昭憲度。祀載典常。蓋名垂于身後。非政息于人亡。比夫皐陶世衰。潛起忽諸之嘆。若敖寡德。遽形餒而之傷。是則惕厲永圖。景鑠洪美。奮名實于簡策。流馨

香于簠簋。諒非此族之名。不在常祀。

三王不相襲禮賦功與時異  
無襲於禮

王既殊號。禮非一同。念典章而革故。因損益以殊風。天地人而異正。繼昭大統。忠質文而參尚。各定元功。至訓攸聞。前經可叙。蓋以教逐民變。禮沿世舉。矧三代之攸聞。匪一隅之所與。前聖後聖。采章由是。而惟新。彼時此時。名器從茲而異處。是曰救弊。非專改爲。昔異今教。今非昔時。爾乃車輅更象。旂常異儀。萬邦爲之承式。百世由茲可知。驪翰駢牲。迭舉常尊之制。子丑寅朔。平推相勝之辭。蓋由夫夏之道。不可行商之時。商之風。不可易周之治。周安商教。則僞而蕩。商從夏俗。則愚而肆。必在深察國體。一新民志。歸乎治而則同。抗其同而乃異。闡朝陽之制祭。不一其儀。立坐酬而享尸。各祇乃事。豈不以政必有敝。起敝者賴乎聖謨。道必有失。正失者歸于永圖。此盛王所以斟酌。大禮于焉散殊。俾至治之我有欲爭心之汝無。時輅冕則異制。立勳作之者聖。松栢栗乃因宜。建社無得而踰。若然。則揖讓干戈。各歸乎允執。聲明文物。安得而相襲。視前跡以交勝。表大勳之旣集。亦由日移月運。各異象而明生。暑往寒來。不同時而歲立。用能鴻名交至。美化迭居。湯纂禹緒。周變商餘。百王仰止。萬物依於。絳冥稷之恢祖功。並隆祀。夏漢武之昭樂綴。參美前書。誠哉。改作嗣興。鼎新光啓。儼膠柱于舊典。曷轉圜于治體。三王之作也。豈徒然哉。君子謂之知禮。

鵲鳥不雙賦

雄鷺之極無有比倫

鵲被鷺鳥羽族之雄挺異稟而邈焉自處俯衆禽而莫與爭功厲擊之羣豈顧連難之桀翔翺獨任寧虞六鷁之風稽乃物情驗諸前志蓋內稟于介特實中存于猛鷺所以擅美惟一爭先寡二殊姿鵲立詎知乎入不亂行迅體鷹揚但見夫出乎其類志自我適衆徒爾爲顧絕倫而示乃非命匹以求之食鮮罕儔鄙燕燕于飛之際翰奇寡和異嚶嚶求友之時質謝羣居心存霄極將專累百之美以保獨清之德靜惟介立靡從舒鴈之行動必雄飛安俟比鷁之翼少之爲貴疇敢以踰排天宇以上出冠雲羅而德孤蔑飛鵲而在下視持鷁以如無介處可徵方擅威于夏習羣翔莫得遂專制于霜誅不如是則何以厲逸翮而遠圖據嘉名而奄有下韞而視不留阿厲吻而擊無遺走雄姿絕俗殊雉雉之應媒隻影戾天諠舞鸞之索偶嗟乎氣皆從類物必有倫何茲禽之特異由至性以難馴雖同乎必慎其獨當恥乎比之匪人臨敵有餘豈免趨之可逮于霄直上諒鳥合以無因別有繞樹可依搶榆而止雖攷類以各異顧呈材而易比未若我出叢萃而超等夷一舉千里

王畿千里賦

畿制千里尊大王國

王有一統人無異歸中四方而正位畫千里以爲畿總大衆之奠居式昭民極據方來而處要以重皇威二代而還維周有制擘庶績以圖大廓多方而爲衛作我上國垂諸永世以爲地非中夏無以示天子之



常尊土不一圻。無以待諸侯之入計。爾乃測圭于地。攷極于天。風雨之所交者。道里之必均焉。郊野錯而回合。鄉遂亘而蟬聯。溝封斯萬。疆場且千。差籍九畿。定夫家于都鄙。出車萬乘。括賦入于原田。是謂辨方。且非期修。廓焉天府之國。巍乎王者之里。爵祿命賜之供億。朝覲會同之底止。不偪陋以取侮。不誇矜而役美。俾江海之重潤。乃據上游。法日月之徑圜。用張天紀。且其蠻夷面內。玉帛駿奔。內則百官承式。外則四國于蕃。化之遠者。禮益廣。居之衆者。務愈繁。必在制廣輪于有截。示極摯于羣元。倍十子男。大有由而御小。任包旬稍。卑不得以倖尊。亦猶天之高。靈物而無外。地之厚。廣生而咸賴。使高而可度。則寥廓何仰。厚而易知。則沈潛有害。是用控天下以咸。又極宸居而稱大。詩美四方之是則。理乃同歸。史稱後世之無加事。誠胥會。美夫周原膺臚。禹畫芒芒。或處瘠爲教。或建瓴是防。然皆按成事于神句。跡前謀于令王。所以漢相論都。首識金城之廣。召公相宅。前知墨食之祥。洪惟我朝。奄有方國。託洪基于天地。亘長藩于道德。所以申畫邦畿。是用守之無極。

龍杓賦器爲象  
名有龍者

昔夏后氏之祭也。制龍杓而用之。爰有形于神物。俾致用于宗彝。存身醴畢之中。初蟠緝禮。驤首陶匏之內。遂奮鴻儀。懿夫義著禮經。功參祀事。蓋恭神而祈福。乃觀象而制器。謂龍也冠四靈之首。謂杓也統六樽之義。奮鱗昇几。旣三獻而有容。引首負樽。俾萬靈之具醉。蓋由象著。且異文爲。登祏室以獻狀。滿醴醪。

而挺姿。始訝躍淵。灑汗樽而俯映。乍同銜燭。焰明火以前施。其用足徵。其儀不爽。炳九采以入用。先六瑚而列象。寧虞探頤。儼祝史以獻酬。自契攀麟。對孝孫之俯仰。則知龍者所以作繪。杓者于焉寓名。匪徵奇于假象。蓋絜意于精誠。雄視爲鹽之虎。俯連酌兕之觥。暗想召雲。蒙鬱香而宣氣。潛疑窺牖。歷清廟以持盈。外實而有文。中虛而思受。蜿蜒于鼎俎之外。天矯于豆籩之首。雞彝莫得以同列。獸樽視之而何有。時乘斯驗。固當神享之初。勿用可知。蓋在禮成之後。且夫超騰祭典。攄變禮容。將挹旣清之酒。用圖莫智之龍。垂名不俟于紀官。司存盡在。屢進何憂于過亢。酌獻彌恭。夫如是。則昭事上神。外迎純嘏。取鱗長以爲飾。配雲螭而在下。是故觀其龍也。則而象之。用其杓焉。禮無違者。

琬圭賦

王賜之節  
修德崇好

彼玉之貴。待人而彰。嘉琬圭之作瑞。旌列辟以勤王。使介奉承。殺鋒芒而見美。纓文升薦。挺溫潤以含章。古者利厥建侯。寵其受賜。琢茲纘栗之質。獎彼蕃宣之懿。事備著于周官。職兼存于漢紀。秉爲瑞卽。爰發采于帝庭。奉作龍光。自凝華于國器。始也效珍美璞。獻狀攸司。圓首露粹。方形究奇。信爲寶之尤者。非假人而用之。巾錫以庸。居有握瑜之美。保持在德。絕無磨玷之疑。及夫臣告成功。君嘉茂烈。則是圭也。出國之府。旌邦之傑。外碌碌以云堅。內溫溫而表潔。其致也。行人達命。邁刻虎以爲符。其聘也。大夫以時。越鑄龍而用節。噫。治德本乎無怠。講好在乎勤修。爾功之昭。則贈圭之重。彼績不建。則貽玉之羞。是以上無虛

授下廢妄求。初疑前詘之葵。光昭臣範。終比不趨之玉。茂對王休。是知嘉乃愛民。觀其述職。保邦則據以爲重。命事則陳而有翼。什襲之緹。是奉何思。越鄉五等之爵。不踰蓋將比德。和難者安能均美。判規者未必同功。曷若我徽章所被。禮典是崇。蘊虹采以自照。賁天光而有融。受事于朝。式並舜頒之瑞。永孚于下。本非周剪之桐。美哉。元后嚮明。多方匪傲。不愛寶以酬德。惟協邦而結好。爾公爾侯。宜念吾王之厚報。

〔案〕此賦係明道元年召試學士院所作。祔即直史館。見東原錄。

水澗成梁賦

先事成績人則無患

水澗于澤。梁成在川。欲濟民而有要。務底績以爲先。仰視天根。爰謹度材之始。坦成周道。居當病涉之前。伊昔哲王。深圖能事。謂土工不可不集。故用于有節。地險不得不達。故成于豫備。國守舊章。人資長利。歲云暮矣。弗踰收潦之辰。工則度之。潛識造舟之地。徒觀夫三農云際。百穀旣成。天寥寥而雨畢。波渺渺而川平。山是鳩工。無慮爲力。有程一之二之日。徒枉旣飭。三之四之日。興梁悉營。架濬壑以航聯。遂知攸濟。截重淵而虹度。蔑有留行。何則。措事以時。有動而無斃。均利于下。未勞而成績。我乃攷時令之閒月。舉津塗之力役。欲俾從橋乃安之士。惠爾肯來。遇深則厲之徒。昭然有適。況夫關防者何國。蔑有啓閉者與時。而新又焉得怠。經始于餘力。壅方來于後人。使馬蹏來足。車停去輪。是以蒞道未除。單襄有以垂其戒。乘輿而濟。子產不得稱其仁。噫。惟上所以教民。惟官所以垂則。此不善用。彼焉保力。是用乘戒塞之。調節煥

濟川之丕式。寧比夫營澁詭計。矜懼服于隨人。獨權取財。務誅求于漢國。夫然。則候人在境。司空視塗。著以成法。又夫永圖。道路之行既遠。風波之患終無。作者匪勞。濟畢九州之險。事方有備。何存一日之虞。美夫時倣交修。茂功無間。據嗣歲以獻狀。俾臨深而除患。敢告有司。宜先時而物辨。

# 景文集卷四

賦

日在北陸而藏冰賦

寒盛之月  
藏著冰室

古者上求辰次下立正端視北陸以爲候納層冰而命官枵次可瞻既乘陰于窮谷興人畢入方用牡于司寒茲乃順天之經降邦之命使陰不得閉而成告陽不得越而爲病是用測日所在居冰方盛一日之氣方烈烈乃俟顓頊之躔二之日鑿焉冲冲遂舉凌人之政觀夫順攷舊典申嚴有司彼日之道在虛之維有史氏以戾止有虞人而致之乃曰藏乎以道今也其時愛景方融霜有至堅之象隆冬聿暮狐無可聽之疑然後積水並營窮山異伐丘聚鄉縣玉堆城闕投治鑑以彩凝射清壺而光發動而合禮當呂紀之小寒居不踰時本邪詩之七月嚮若官失其業君怠于常歲日旣易川池弗藏時則有淒風苦雨時則有厲雹災霜人誰禦之物薦臻于疵癘咎常燠若天取譴于陰陽我是以利不素愆事因微著步暑歷以潛測厲嚴凝而豫慮六龍回薄仰觀象以告期九澤腹堅悉送官而待御噫恭授惟日畢賦者冰二端以協百度其凝用能俟朝覲而惟謹逮火出以同升獻羔羊而始開廟祧云薦被桃弧而後賜祿位其承宜乎左氏直書中豐善述示後代之成憲著先王之要術日之至兮冰之藏敢告凌陰之室

去邪勿疑賦

明后之政除惡無惑

邪惟害政。令貴必行。嘉討惡之無惑。示爲君之至明。暨讒說以並除。志無留斷。放儉人之甚速。奸不容生。事表前經。功歸哲后。將欲杜乃多僻。用以垂于永久。謂拒衷說者。本乎義勝。鑒疑心者。絕乎膚受。果于除惡。咸施之計。何從。利在繩愆。猶豫之心。奚有。朕志先定。爾無我欺。竄庸違而一盡。蕩惶惑以無遺。非由不早辨也。但見削而投之。銳撥亂之聖功。寧煩顧慮。決擒兇之治典。豈俟沈思。蓋由邪不可與守邦。疑不可與承命。故我總攬衆議。裁成庶政。不終日以明罰。靡盬時而出令。所以四凶並殛。彭大舜之重華。七日必誅。表宣尼之至聖。則知邪不必大。去之于初。疑不以細。察之在予。繇君虛之昭若。乃國經之晏如。邦憲必加。貴于將之立斷。佞言必遠。防蔓草之難除。況夫決惟智君。存乎主略。懦者不事。戒乎紛若。兩端之虛僞。起三至之言。必作衆方共棄。何傷速卽之刑。事苟有猜。將致不悛之惡。又安得恢明治本。鞏固洪圖。絕邪道于彼有。俾疑情于我無。禁僞防奸。詎稽遲于天罰。去貪攻昧。敢猶豫于靈誅。宜乎縣代垂言。方來作式。示必信于奸究。詎致疑于典則。然後不仁遠而至道昌。撫安萬國。

與人不求備賦

君使臣下無責其備

才不求備。職惟有分。伊專任之臨下。俾竭誠而事君。人各有能。敢十全而責實。臣無虛受。但一善以圖勳。古有辟王。善于任使。精較民極。稽參國紀。以謂性既萬變。道非一揆。或工大而拙小。或樂成而憚始。故我

差以物序。合之天理。事無俱得。異全能于聖人。功靡兩求。殊不器于君子。徒觀其外。盡羣慮。中經大倫。登于朝。則求文德之士。扞于國。則求武功之臣。過不掩善。言無廢人。尺有短而寸有長。迭期就效。韋自寬而弦自急。各俾修身。且夫百行至難。一人至寡。苟取盡美。必乖御下。昨之非也。未易輕棄。今之是也。胡能遂捨。所以由于扞難。但論績于受戈。裨譏經邦。豈責成于謀野。豈不以能否並列。功惟萬殊。賢佞異稟。理非一途。猶夫良匠度材。長短隨其制。巧冶造器。大小盡其模。然後用物不失。遺材則無。易治潁陽。可驗薛宣之教。優爲魏老。足明公綽之徒。如是。則何往不臧。惟變所適。材不吾過。官胡爾責。豈徒列于訓典。乃備存于方策。隻輪甚恥。穆公忘一告之微。冠玉非賢。漢后收六奇之畫。噫。內不兼外。尊無預卑。儻上紊于天秩。曷俯經于國彝。用實咸若。功將總其。聖在孔門。尙四科而辯論。明于舜典。猶九德以疇咨。宜乎古訓騰文。先王著義。覽萬國之共理。豈一夫之必備。儻推用人之心。可研天下之志。

十二管還相爲宮賦

宮則時主  
相繼而王

十二之管。還相爲宮。自南三而資始。播吹萬以無窮。協构建于斗綱。互分正位。應雌雄于鳳律。狎至成功。尙矣聖言。淵乎太極。包二氣以賡隱。參五行而垂則。氣物相盪。盈虛並得。迭處迭去。忽微由是靡差。一往一來。休王從而可測。懿其自律召呂。猶尊及卑。氣逐候至。陰隨月移。天不能以道愛。日不能以氣欺。隔八數以迴旋。來皆有次。定三分而損益。動各乘時。且夫管寓其形。宮謂之主。我當其會。則衆音不得不集。彼

據其正則羣倫不得不輔。蓋以下括人紀。上分天部。陽唱九而陰唱六。密極毫釐。呂生子而律娶妻。應如規矩。豈不以二儀之氣。順之則爲祥。三辰之序。差之則降殃。故我轉五音而並劭。如四序之旋相。遂使春不愆暖。秋無迭涼。本自黃鍾。始同功而異位。終于南呂。遞捨短以從長。故得均校盈虛。宣精啓閉。本本無失。生生相繼。彼既舊而此新。吾將崇而爾替。風由氣發。六十數而成聲。月以辰同。三百旬而作歲。美夫一動一靜。或煦或吹。得之者空積威若。失之者慘舒遠而。亦猶三統體元。惟紀正于升降。六章凝采。互爲質以彰施。宜乎萬寶該成。一氣洪暢。顯厥應而有旨。當其時而自王。故吾于宮律之間。見天人之情狀。

大信不約賦

誠著天下  
無取於約

君惟去僞之道。約乃未孚之名。既外盡于末節。俾中含于至誠。化自不言。表聖人之執契。衆將來助。非君子之屢盟。原其至治有開。羣生在御。五教既備。百志中處。乃謂信者本也。本立則道化可行。約者末也。末成則僞端益著。故我悉蕩儉薄。專求明恕。同底于道。詎屑屑于至期。不戒以孚。豈孜孜于豫慮。何則。信出于我。感物而能宣。約徇于彼。致疑而易愆。在顯猷而祇若。胡約請以紛然。得不遠取諸物。仰觀乎天。萬彙生成。本宜符于氣候。三辰益昃。孰邀會于經躔。薰然太和。納以純嘏。蓋明亮而格物。匪誓言而接下。武有不期之伐。功乃告成。蒲稱肯命之辭。違之蓋寡。勿謂信之小行而永孚。勿謂約之至久而必渝。譬夫道之深。反見其不器。德之盛。乃謂之若愚。理自吾有。詐將爾無。明允克敦。令未行而已應。篤誠斯至。祥不召而。



先符亦猶神無言而四時行。海不爭而羣流聚。況夫君唱臣和。聖作物覩。由衷之教鬱興。久要之文何取。鄭交質而無益。足驗離心。周作誓而始疑。終乖禦侮。曷若化行軌軌。功被豚魚。俾大猷之廣矣。寧宿諾以依於。發乎身而加乎民。克昭上德。推其心而置其腹。詎載盟書。宜乎大禮攸稱。明君卒度。體天地之覆燾。總邦家之興作。苟允執以存誠。亦何勞而用約。

祭如在賦

射主明祭  
如彼神在

祭惟首義。禮乃慎終。念奉先而勵翼。必如在以欽崇。肅薦尊彝。悅先靈之可接。祇陳饔豆。訝馨欸以潛通。用能敦至孝于前牒。貫純誠于厥躬者也。作訓其誰。聞諸宣父。稽明祀之備物。欲致恭而爲主。謂夫祭則惟爾有神。謂乎在則莫予敢侮。相其志意。但見懷然如生。儼乃衣冠。孰云無念爾祖。蓋以自邇推遠。居幽達明。彼耿默以無朕。此吉蠲而有成。奠獻彌勤。若奉杳冥之信。齋莊愈篤。如聞歎息之聲。且夫物之感者。莫盛于神。禮之修者。莫大乎祭。所以交乎不測之用。立乃惟馨之制。思所樂而思所嗜。寅命有加。于此乎而于彼乎。精衷益勵。則知祭煩則數。祭怠則疏。故我嚴祀事以顯若。遵時思而穆如。奉鬯而前。望若有求之際。潔粢以進。優同將見之初。若然。則故能立教哲人。垂謀翼子。苾芬之至如彼。濟漆之容若此。其用足見其微可擬。類謀事而就祖。必取致誠。譬入虛而有人。寧忘率履。異夫祭之垂範也。節之以禮。在之告虔也。先誠其身。念酢侑而咸舉。若音容之不泯。允謂孝子能享。至誠感神。亦猶事亡如存。顯周文之永錫。闕。

爲君難賦

天下之大王道非易

於鑠元后。尊臨普天。將圖難而自戒。宜克己以爲先。守則至艱。慮極置危之器。行非孔易。居深若隕之淵。稽夫萬有實繁。一人蓋寡。巍然居上。岌然御下。儻內怠于兢慎。必外彰于滿假。循是要道。茲爲難者。側身修德。答愛戴于黎民。積行累功。念勤勞于宗社。斯蓋憂以啓聖。治無忘危。務謹戒以欽若。敢安懷而守之。堯不糝而舜不殖。方隆國本。湯爲犧而稷爲稼。始定皇基。是則此謂之難。以兆民之吾賴。彼謂之易。以爾躬之彌泰。民賴者允定聖功。躬泰者必悼後害。言之惟訥。我則出令不私。人未易知。我則進賢爲大。亦猶防近者可以慮遠。誠弱者可以禦強。必在祇畏一德。勤勞萬方。懼乎災而災息。敦厥化而化光。所以夏禹克艱。訓黎民之乂德。周公無逸。誡諸子之將王。是則知罰之難者罪不繁。知賞之難者功可攷。聖人憚之。則克此永世。叔葉易之。故失乎大寶。小心翼翼。敢輕視于萬幾。思日孜孜。冀力行于至道。況夫天命弗僭。道心惟微。伊前鑑之有作。誠後圖之習非。七月陳王業之風。由茲可見。一言示興邦之道。于此其幾。宜乎寶業阜安。皇威翔被。昧者謂我不遑啓處。知者謂我靖恭爾位。非深識乎險艱。曷馴致乎簡易。

乘石賦

名器無小因禮爲重

物有因君而重。禮非以陋而輕。偉介石之致用。由乘車而正名。盤委堂陛之間。始空國步。踞重和鑾之地。遂啓乾行。愚嘗眇觀古經。深探聖意。攷上禮之云展。總羣倫而咸萃。求有大而必給。體有微而莫棄。斯石

也。所以賤而獲舉。彼乘也。所以待而後備。惟進退不失其正。仰奉帝儀。非左右先爲之容。自參國器。有方不毀。匪德而隅。旣出類于瓦礫。敢較珍于瑾瑜。履也非患。憑焉則無。本匠石之載磨。發于穹谷。保詩人之不轉。邇及丹塗。觀夫觸之孔堅。瑩如增皎。常抱璞以在下。罔自他而飭表。厥容有扁。旣接之于至尊。其履不疑。故重之于雖小。及夫廟朝有事。采物畢陳。大輅儼而竢駕。華旒粲而承辰。爾乃詔隸僕以進御。對臯居而肅振。洗以示恭。肆夏爰回于步玉。蹈而升駕。屬車遂汎于清塵。可謂勤王而后貴。執禮而相因。彼擊而拊者。樂律所諧。嘉而肺者。民情攸啓。各著邦典。皆參治體。然未若屹如帝所。邁投水以效忠。密爾車前。類補天而贊禮。不如是。追琢何取。平鑄罔施。賤目弗尙。多磬見遺。諒以延帝暉之戾止。輔國章之禕而。簡在王庭。實奉時行之典。始于足下。居呈不磷之姿。異夫元后有求。攸司是奉。竦彼寅畏。格其虔鞏。故曰。捨我兮。履之卑。保我兮。用可重者也。

黃鍾爲律本賦

陽氣之始  
聲律茲始

中之色莫盛于黃。鍾之氣孰尊于陽。本生律以類物。爰配辰而奠方。一以函三。肇無形于子午。九而唱六。列有象于宮商。茲乃研化之先。索和之貴。寓乃氣數。強其稱謂。遡寸管以在下。衍大聲而不旣。推而上據。萬物之始基。左而旋孕。四時之茂氣。作者其誰。伶倫是司。裁筠均厚。聽鳳雄雌。爾乃制其形。取長之最者。比其度。皆可以生之。我作爾信。爾無我欺。以候八風而風應。以呼六氣而氣期。乘二除三。由忖該而有得。

上生益一。咸按歷以前知。然後效陰陽慘舒。參日月盈滿。以定權衡輕重。以均律度長短。先靡益疾。後無加緩。諒由應乾而位初九。處乎太陰。全寸而黜餘分。異夫衆管。且其黃君也。化得君而明。鍾種也。物待種而生。其統天極尊之號。厥位子孰先之名。用能包五六以作合。無忽微而應聲。亦由至道開先。萬物之區。遂判。太極資始。兩儀之象斯成。若乃八音有文。六同命律。二十五之數。十二宮之實。雖動而徐生。皆我之自出。數不敢紊之于首。神不敢藏之于密。異爻得應。見林鍾生子之辰。同位均尊。著姑洗娶妻之日。噫。推歷于彼。統氣在茲。一寒一暑。或煦或吹。本木貴于眇忽。生生著于云爲。候氣揚灰。冠地至而首出。旋宮統月。倚天數以無遺。異夫妙算攸先。正聲有始。尊同心一統之用。助宣氣旅陽之美。諒非軒轅氏之聖功。疇能及此。

誠覆車賦前轍之覆  
來者爲誠

大道有蕩。傾車在前。伊來者之深誠。思遠途之曲全。顧轆轤以摧輪。安能繼進。視彭彭而改轍。式鑒先顛。仰味至言。遐稽往哲。于車誠而引諭。譬人謀而有說。將欲以敗警成。因工棄拙。追昔時之失御。大爲之防。在今也以回轅。下視其轍。徒觀夫流水競殺。輕雷奮輻。千金之子不倚。五達之莊載馳。力且竭矣。遠猶致之。旣嗜進而味退。倏忘安而遭危。敗厥載于積中。金胡及柅。棄爾功于引重。轄靡追脂。得不矯爾前非。求茲後福。彼諒出乎一失。此宜存于三復。譚是險易。潛虞蕩覆。望前驅之致忠。足見存亡。念後乘以方來。敢

矜馳逐。豈不以圖今者視昔。觀往者知來。據福可以慮禍。守正于焉救回。故我假一車之中鑒。協萬物以兼該。拒險還軒。式戒乘槐之蹶。去危發軔。深防債濟之災。況夫訓難誣于後人。諫罔施于往者。必將觀患于外。防微在下。苟遇喪乘之道。引而避之。儻行脫輻之郊。吾其還也。亦猶詩取商鑒。周仁始基。刑誠秦失。漢章有宜。率自先王之道。咸成後事之師。則車不徒喻。誠亦有爲。前瞻泛駕之人。自貽伊感。卻視執綬之子。豈不爾思。異夫身其晦必思于明。志乎夷必防其隘。然後卓爾自立。惕然垂誠。周流乎中道而行。決無淪敗。

德車結旌賦車結旌者  
昭德之美

德美中尚。戎容外除。示同軌于函夏。爰斂旌于大車。清道以行。盡屏垂繆之飾。展輪載効。還同卷旆之初。禮典鋪觀。訓言備列。以爲車之崇德也。不取乎盡飾。旌之曳綵也。宜從乎善結。因乃器用。敷乎帝烈。此駕而俟。蓋專講于禮章。彼舍而藏。示不矜于武節。諒以聖治嘉靖。邦臻治平。思闡化于假革。詎飾威于抗旌。纓就煥然。絕搖搖之曳影。鸞聲喤爾。收子子之流英。盛化當茲。未儀可舍。言車也。尊君乘之至美。語旌也。陋軍容之相假。方且假赫奕于穀佐。輝聲明于帝者。興音在御。纏乃旒而弗彰。輪節載和。曳爾旂而蓋寡。則知車必稱德。以其當假武之朝。旌必命結。以其惡盡飾之標。然後潤國容之濟濟。藏禮器之翹翹。載戈之德同邵。動膺之譏且遙。鄙楚廣之建茅。但專武事。賤晉軍之畫旆。益味文昭。在夫外損祲容。內充至德。

越暢轂之務戰。矯宣車之宣力。我衡既倚。于以歛文羽之繁。我御既均。于以褫武綏之飾。彼朱髦炳于漢牒。元乘載于周詩。或邦光之克煥。或武怒以攸施。曷若明達至治。裁成上儀。奉乃麟麟之音。文爲貴者。願厥悠悠之質。卷而懷之。懿夫化極偃修。教臻善美。乘其車也。見作者謂聖之道。結是旌也。示不復用兵之旨。噫。奚由知盛德之然哉。以此。

# 景文集卷五

## 風雅體詩

順祀詩

并序〔案〕仁宗本紀慶歷五年十月辛酉。禘章獻章懿于太廟。與此相符。

臣某言。伏見去年七月壬寅詔書。章獻明肅皇太后。章懿皇太后。並祔真宗廟室。有司擇日具儀以聞。其十月辛酉。皇帝步自文德殿。奉玉冊玉寶至大慶庭中。再拜以命丞相臣昌朝。臣執中曰。假爾節。其遂告于廟。臣昌朝等再拜受命。容衛焜煌。不譁不敖。款于奉慈。昭告如禮。然後奉章獻明肅皇太后。章懿皇太后。木主。納諸太廟。有司至孟月之饗饗焉。已事丞相率百官詣閣稱賀。有詔大赦天下。釋罪已責。賜羣臣軍校各有差。恭念盛德形容。所以告于神明者。宜有聲詩頌歎。以播樂府。臣某被學已舊。受恩寢深。前日預聞朝廷末議。今茲攝事省闕。不當以斐然捍格。自棄諸儒之後。輒夙夜齋祓。撰詩一章。前倖猗那。後訂清廟。刺取經誼。以輯其辭。又惟三代以來。娶止一姓。姪娣有序。勢不相踰。故配食納寢。止一后而已。由漢而下。盡革周制。繼室誕聖。均極尊名。而諸儒拘摯。仍執故典。競無實之偏論。破適世之至權。遂使漢祠別園。梁建小廟。礙禮不厭。抑感弗通。罔極之報。則篤于一情。以時之祭。則判爲兩祀。列辟未悟。庸可嘆哉。且善教者不拘古以妨今。善禮者不後情以先物。唐明皇帝主于合祔。失于敍升。故一王之典。闕而不昭。先

帝獨啓聖慮。順躋二德。侑太宗之尊。陛下述遵前憲。寅奉二章。參文考之祔。然後天下之議。披髀發部。知前古之謬闕。當今之適宜。親親尊尊。粲然無惑。故詩之所陳。揚摧熟復。繁而不簡。亦咏歌不足。不知舞之蹈之之義焉。臣某頓首以聞。

孰順其祀。明明天子。天子謙讓。詔羣臣其議。惟章獻章懿。遂祔先帝。宜索而典。而古而今。順攷攷宜。慰我孝心。羣臣稽首。不遠厥成。伊先猷是程。伊大孝是經。匪祥符孰從。則莫我京。三代廟寢。止一帝后。漢制已遷。儒臣罔究。禮缺不稱。因樸趨陋。親靡祔尊。神挈斯祐。帝曰俞哉。予奉二慈。匪曰無典。實成訓是依。促灼爾龜。爰絕爾儀。琢金追玉。昭款信辭。不敢先後。惟以順躋。孟冬十月。大饗其時。朕不憚勤。于庭遣之。吉日辛酉。帝自文德。至于大慶。奉寶授冊。永懷劬勞。孝貫天極。虞賓在位。百官承式。顯顯太歲。惟冊寶是將。和鸞有容。龍旗孔揚。既至于廟。是承是告。奉遷后主。合侑文考。有主則止。有匹得行。遂旅豆籩。以及芼牲。明水太羹。有饒有澄。鼓鐘欽欽。鼓瑟鼓琴。考悅妣安。蠲我德音。德音惟何。帝受純嘏。不專斯饗。用赦天下。開釋罪辜。賜逮九軍。一人作孝。庶邦蒙仁。禮非天作。托始于聖。聖克正始。萬世攸定。作述交善。神人胥慶。天謂皇帝。既付所覆。帝克孝治。奉親以侑。其收丕祺。蕃衍後昆。萬有億年。繼繼存存。

上許州呂相公嗣崧許康詩二首

并書（案）宋史呂夷簡傳夷簡討中國公景祐四年夏四月以鎮安軍節度使同平章事判許州四

十一月一日。尙書刑部員外郎直史館宋祁敢再拜奏記相國中公執事。竊聞古者堯有四伯。是爲四岳。



實佐文命。降宅九州。帝庸嘉之。故賜姓曰姜。命氏曰呂。在周宣時。有申甫者。能左右王室。以興周道。國人美之。爲作崧高之詩。道降神之異。仲尼掇焉。以什于雅。在春秋時。有齊許者。盟會糾繆。幹不庭方。以大承厥祀。有祚在下。史世有家。爲諸侯選。由是言之。呂姓之衍于申。曼于許。厥惟舊矣。恭惟相公。憑極天之峻。乘蒸民之聲。慶叢祥發。與聖參會。言行而帝采亮。謀奮而天緯和。散爲九功。宣爲六德。沛如淵回。湛若陽休。勸相丕后。十有四祀。助薰燎而郊者四。導農輅而東者一。而鬼神無遺歆。戴斗之使歲通。戎蠻之費月來。而疆場無猜侮。士之賢者進。無能者退。邦之不足者與。有餘者取。而上下無尤違。三辰澄霽。百穀露野。佑我不業。格于皇天。跡夫感會之隆。幽贊之協。要可知已。有大岳基其兆。有申甫奕其先。有齊許蕃其系。靈光孫謀。是相是鍾。天而未忘叔仲之德。是故復申之字。以陪敦章大。卽許之舊。以濟美顯庸。傳曰。惟其有之。是以似之。公之謂矣。某不佞。學于舊史氏。知吉甫史克之作。以事美一時。託文見志。遂得聲滿天地。于今稱誦。不自知量。謹作嗣崧詩五章。章十句。美公之國于申也。許康詩五章。章十二句。美公之安乎許也。立言之體。略細語大。故推而上之。以及于祖。辭必欲類。不容虛美。故循而下之。後及于公。古之賦詩。義取卒章焉。嗣崧之亂。曰壽考是承。士大夫之祝也。許康之輯。曰帝曰還歸。邦人之志也。雖不足雍容揄揚。其義肆而不隘。輒因誕日之慶。繕寫馳獻。侑奉觴之餘歡。伏惟一加觀采。裁貸其罪。不宣。某惶恐再拜。

嗣崧詩

嗣崧大丞相四岳之後復國于申也。

彼嶽惟崧。天作其神。嗣生我公。我公斤斤。嘉猷矢陳。柄國之均。帝親命之。纂成前人。不顯其道。惟申是保。公邁厥德。祇祇翼翼。柔嘉而直。模我彝倫。揉我方國。施于夷貊。百度是毗。庶績允熙。罔敢不恪。惟公是若。帝詔執事。徵申土疆。衍沃腴良。賦輿漆漆。莫樂于申。昔在四岳。佑堯象禹。爲國心膂。受民作邦。于今以光。帝告于公。紹肯爾宇。憲是文武。如申如甫。爲周之輔。誕錫爾祉。惟申甫是似。乘車錯衡。淑施英英。式邁其榮。公拜稽首。敢揚王休。祈天之久。爲天子萬壽。彼嶽磐磐。松柏丸丸。公福祿實蕃。有崇而岡。有大而陵。公壽考是承。

嗣崧五章章十句

許康詩

許康。申公均政。勞而康乎許也。昔四岳之裔。在商周間。有申有甫。有齊有許。而公又作屏焉。邦人宜之。故作是詩也。

許麗而康。岳孫奠之。曰公之屏。實維似之。公徒增增。朱綬綠縢。不懸不驚。鉤膺鏤錫。稱娣顏行。嘖焉綏章。總我列侯。式時南疆。公之相攸。孔樂于許。其原膺膺。其川訐訐。有芃禾麻。有京稷黍。藪焉麋麇。渚焉魴鱖。有李有桃。有栢有檀。樹我之園。令居則安。公視于庭。師兵翼翼。孔武有力。公適于府。陪卿髦士。罔不就緒。

公宴于堂。嘉賓我從。琴瑟鼓鐘。或楔或撻。靜好鏗鏘。萬舞有容。左拂其殺。焦鼈燔羔。給鮮于庖。右烹其簋。筍落蒲莖。柔嘉惟馥。旨酒且多。其飲溫克。攝爾攸儀。侑公宴嬉。俾胖而樂。俾艾而耆。明明天子。股肱一體。于蕃于宣。邦人咸喜。主茅之山。浚潰之渠。弗童而材。弗竭而漁。皇惠斯人。俾公焉依。公報其成。帝曰還歸。許康五章。章十二句。

## 五言古詩

### 夜直省舍

省舍諸吏休。前軒成獨步。月色淨牟首。星痕隱溫樹。稍聽班馬鳴。猶見昏鷄度。索居易興感。幽抱邈誰晤。自問濩落姿。胡櫻文墨務。企歡無剩娛。卽事有盈慮。遠寄江海心。冷風儼能御。

### 省舍晚景

日稷城陰生。塵露稍云歇。密樹抱烟沈。高禽映天汲。外物旣不優。清機亦徐發。何意義皇風。吹我襟袖末。少駐北堂陲。娟娟待明月。

### 正言田學士泥書言上庠祭酒廳北軒予所種竹滋茂

昔承上庠乏。蒔竹北堂軒。飭吏勤浸灌。冉冉榮孤根。日晏到官下。對賞忘塵喧。海月影宵用。天風籟晨顛。去年主人斥。負謗爲淮藩。後來異好尚。欲諉不敢宣。何幸覲時哲。乃加封殖恩。千里走書驛。語竹遙相存。

不才好冷局。異日期歸旋。千萬屏剪伐。勿令孤願言。

仲夏愆雨。稗苗告悴。輒按先帝詔書。繪龍請雨。兼禱霍山。淮瀆二祠。戊寅歲祀己卯。獲雨。謹成喜雨

詩呈官廳

盛夏挾驕陽。于以構炎煥。歛塵空天蓋。烈御煽雲漢。稻穎苗然秀。涸流不勝灌。田峻卹歲功。釋耒共愁歎。太守忝農使。閉閣重慙惋。曾是謬政綱。曾是濫囚狂。一食三失匕。冀亦思過半。馳視訴羣望。願以身塞譴。先帝隱民瘡。致和格靈變。圖龍著繪法。令甲布州縣。愚計不知出。奉行安敢慢。外日築層壇。丙夜封舒鴈。奉匱再三跪。信辭靡虛薦。幸勿爲龍羞。敢不報神眷。翼日耿弗寐。徂野視宵奠。幽血粲靜燭。執事便傳譖。薄誠蒙昭享。距躍私自忤。回車未及稅。雲油默焉徧。窮海遂涔涔。龍山茲漫漫。旱麓衆卉蘇。焦原喝氛散。寸苗蔚如握。新波鱗欲渙。何意一溉資。有望千箱衍。揆予乏嘉績。聖詔仰成憲。恤祀神罔恫。昏作人胥勸。抒藻拙言詞。竊用慰羣掾。

長葛道中作寄侍讀梅給事

仲春告言歸。道次古長葛。水窮旣舍舟。僕具始脂轄。南登高原望。天宇莽摩豁。溱澧澹無波。茅隲森相軋。春鳩日夜鳴。陽膏淺深達。田峻挈壺漿。稚子勤槌撻。驅牛洒先桂。趣車載輸秸。郊柘色欣欣。梢溝流活活。縣官恩澤美。農節未膏奪。賢牧謹詔書。民隱罔遺察。射蠲贅聚勞。鄉兵初免閱射賦檢誅求猶。我亦占一廛。聞茲

慰饑渴。矢詩雖不多。要附許風末。

去郡作

解龜淮陽區。浮鷁暮春月。州民擁前道。重爲使君別。尊酒卻略跪。絲管參差發。共謂君此行。寵命煥朝節。進伏丹泥屣。勉之奮芳烈。使君暫且嗟。處躬素衷拙。雖爾荷賜環。安敢冀榮輶。頓首謝上畢。行當避時傑。願移邦人愛。孤根保勿伐。

壽州十詠

〔案〕十詠題熙熙閣、白蓮堂、春暉亭、式燕秋香、狎鷗齊雲、美陰、望仙、清澗等八亭。今缺美陰亭一首。

熙熙閣

東譙已自高。復此構層宇。誰謂淮南遠。風物美無度。飛岑納畫碧。流月遺宵素。揆予乏仙氣。樓居庶可慕。白蓮堂

堂皇敞而華。欄牙照池水。鈿葉蠹新團。玉葶粲繁蕊。游鱗竟潑潑。幽石仍齒齒。寄言採秋芳。何必涉江涘。春暉亭

涉園憇何處。道左蔭華榱。幽尋乏朋往。勝晤徒自知。文禽弄不歇。惠風至無期。含情重徙倚。物色到霞霏。式燕亭

使君班春還。于焉衍吾屬。四阿住疊棘。聊以便涼燠。棟表飛雲逝。題端邀月宿。無德與斯人。式宴良自慙。

秋香亭

蘭菊被秋坂。危宇冠層巔。雜樹自隱日。脩條爭刺天。石斜苔附秀。樛窮蔓倒懸。擷英欲誰遺。伫立徒娟娟。

狎鷗亭

昔人有機心。鷗鳥舞不下。太守心異昔。寒灰與時化。爾旣不我猜。余亦無爾詐。隨波以全軀。于茲伴多暇。

齊雲亭

肇允締層宇。峇峇少城隈。憑軒肄師子。予始創此下臨都場時于此閱武戲中坐合賓羣。白日披霞上。蒼山障霧回。眷言西

北道。吾師安在哉。

望仙亭

嘗聞淮南王。雞犬從此去。至今山頭石。馬跡尙有處。使臣辭從官。終日絕塵慮。望望雲漢間。想見賓天馭。

清漣亭

煙篠環曲隄。飛軒俯幽渚。水容靜可鑒。倒見城頭樹。青蒲蠹爾秀。白鳥瞥然去。勝晤與時新。遂歌奚能叙。

草木雜詠五首

楠

童童挺十尋。一蓋摩空綠。斜月礙枝回。涼烟附葉宿。拙斧無妄加。要經匠者目。

藤

虺蔓相結蟠。虬梢互回屈。紛若未契繩。繁如已綸紵。峭格外團陰。尤堪庇炎日。

〔案〕此詩宋詩存缺結韻作五言絕。

櫟四時開花作實

紺實紛纍纍。柔柯緩若若。葉以代新陳。花仍開續落。味雖不常御。香能破醒惡。

俗傳醉者嗅香輒醒。

海欒

哆熾風葉張。困皺雨皮厚。叢櫟列蓋端。攢施注旗首。物以希見珍。材緣怪志醜。

枇杷

有果產西裔。作花凌蚤寒。樹繁碧玉葉。柯疊黃金丸。上都不可寄。咀味獨長歎。

塞垣

塞垣八月暮。百卉已淒然。沙驚甌脫路。霧暗單于天。衛霍始開府。辛趙數屯邊。塵霜薜金戟。攢月駛飛鋌。彫弧六鈞勁。犀札七重穿。一戰薄瀚海。再討窮祁連。露布報天子。稱觴壽萬年。

春集東園詩并序及李獻臣以下六首附

春集東園詩者。端明學士獻臣李君。翰林伯中王君。天章侍講原叔王君。館閣校勘景純刁君。永叔歐陽君。子莊楊君暨予。仲月既望之宴所賦。是集有三勝焉。地之勝。則如左。睨都雉。前眺畿隄。林籊灌叢。鋪紫

自環時之勝。如載陽之辰。戢慘儔舒。惠氣韶華。怡豫天區。賓之勝。則如朝髦國俊。清交石友。駕言相從。簪盡就閒。三者先具。吾人所以擠天下細故。徜徉蕭散。而自適其適也。若夫頽擲仰援。有藹有枚。參行迭饋。有載有醪。時哢嚶然。可以悅耳。野芳芑然。可以藉席。輕風舞于快餘。鮮雲曳于曠表。樂斯咏。咏斯陶。僉謂會之難常。詩之可以羣也。俾永叔列韻。坐者陳章。予與題辭焉。以詫其美。昔鄭區區一寰內侯。使七子從趙武賦詩。以觀鄭志。陽秋尙之。今多士樂事。萃此王國。選言足嘆。一出治音。使如武者觀諸君之篇。則知賢鄭人遠矣。章別十二句。句五言。雜附左方云。康定紀元之次年序。

賦得筍字天章閣待制宋祁子京

茂氣逼春達。結客並游軫。勝踐屬園墟。歡言駐騁引。踟情適野豁。遠日向天盡。林馥樹纔花。町蹊篁未筍。飲來無留酬。嘲往有餘職。耳熱謝時人。戚戚良可憫。

賦得藥字端明殿學士兼侍讀學士李淑獻臣

東城桃李春。結客玩珍藹。試過辟疆園。兼屈中郎屣。筠苞煙蔽虧。柳帶風眠起。岸幘藉芳芳。銜杯嗅新藥。留連魚鳥適。放曠山林喜。意賞殊未闌。更作櫻廚擬。

賦得葉字翰林學士王舉正伯中

芳辰聊命駕。郊野賞心愜。亭幽路鬱紆。樹密花重疊。暫紓朝紱勞。喜與朋簪接。談塵逗松枝。宴賞澄竹



葉舍和寄蕭散。選勝窮登臨。行樂且躊躇。此遊非日涉。

賦得蓼字天章閣侍講王洙原叔

燕退朝事希。鳴騶出雲閣。近遊速朋彥。名園接闌郭。幽芳尙閒整。新樾已清漠。歡談一坐傾。遞飲百分涸。我亦醒而狂。遵溪縱行樂。晚駕方惜歸。正巾墜香萼。

賦得翠字館閣校勘刁約景純

託載東城隅。選勝名園地。不問主人來。聊適尋春意。簪花照席光。藉草連袍翠。烟霏遠樹迷。風獵繁英墜。促行激灩觴。少駐雍容騎。四者信難并。安敢辭沉醉。

賦得節字館閣校勘歐陽修永叔

綠野秀可餐。遊駿嘉初結。芸扁苦寂寞。禁署隔清切。歡言得幽尋。況此及嘉節。烏喙已關關。泉流初決決。紫萼繁若綴。翠茗柔可擷。屢期無復時。芳物畏隨竭。

賦得蓓字館閣校勘楊儀子莊

芳節未晚晚。名園好澄霽。停車沒徑苦。移席傍叢筆。蝶粉留紅房。蜂鬚抱香蓓。微波生酒杯。輕吹拂衣袂。何當名教樂。況復昌時世。歸鞅惜餘歡。陽烏不可繫。

七不堪詩七首并序

昔嵇康有書抵山濤。自謂有七不堪。恐不可居世。雖抗言自任。亦篤性使然。予年過四十。抱支離之疹。移告時滿三月。臺家未之劾也。而因病成老。習惰成愆。向之不堪。予皆有之矣。自念官在史氏。執筆右螭。不容頽放。以安于無用。聊作七章自歌之。亦自傲云。

一不堪。性嗜日高寢。疊鼓震餘夢。星毛欹倦枕。冠劍朝已盈。當關視門闔。  
二不堪。草野樂垂釣。潑潑錦鱗游。簞簞翠竿掉。夕負槁桐還。行吟面煙微。  
三不堪。坐痺不得搖。湯沐乏薰濯。蟻蝨喜爬搔。俯惕板在手。回慙綬結腰。  
四不堪。不喜謝書疏。正無刀筆能。拙作餐飯句。自勉信非長。愆酬亦逢怒。  
五不堪。未始臨喪弔。倍重秦失號。禮譏老聃笑。勉順當世情。爲哀損真妙。  
六不堪。不樂俗人共。聒聒沸蠅集。紛紛臭孳衆。怒遷多市色。禮煩方聚訟。  
七不堪。東紳對文案。吏若鳬鴨趨。文驚朱墨忤。自爆安所能。深心託蕭散。

庫部閔員外還都

望郎東南秀。巍然悟真理。身雖宰官身。子卽諸佛子。畫諾閣鈴下。塵慮未嘗滓。成金不復礦。見月詎存指。東道整朝珂。西亭摻離褰。無用樂山林。山林卽朝市。

葵

剉蘂染新齒，插鈿成密房。仙人文玉字，宮女道家妝。聞說藥間露，能令肌骨香。



# 景文集卷六

## 五言古詩

### 和登山城望京邑

子牟懷魏闕。陳威思帝城。他鄉豈不美。吾土樂所生。況復撫凋節。憑高懷上京。山川不可見。葱鬱凝神縣。紫氣抱關迴。玉斗侵城轉。負羽長楊獵。撞鐘平樂宴。高冠照華蟬。英俊皆比肩。朝奏主父牘。夜召賈生賢。五侯交薦幣。諸公亟爲言。我生流離極。十年悲去國。葉願洛陽飛。魚寧武昌食。當棄關下符。一對危言策。送平陸知縣尹象先

之子被尉薦。走馬赴關西。西人待賢相。撫育庶有宜。羌羶汙右鄙。秦隴含創痍。健將貪屯聚。碧柵猶鱗差。四年結不解。糧餉先自疲。兵分勢已弱。賊入縱橫馳。營陣訖不立。安得張吾師。比來守禦計。尙復紛相訾。子今位苦下。何由能奮奇。悉力字羸瘼。姑守簿書期。

### 次陝郊

驚風吹客夢。西落劍南天。自問何爲爾。官牒見嬰纏。遽傳非久舍。黎明徒御喧。俯輪千仞底。仰轡百尋顛。憑高一以眺。野氣正蒼然。崖奔仆僵樹。湍躁啼荒泉。羈禽易去木。奔麋不擇阡。撫物重增嘆。去邦邈以綿。

何爲久行役。坐使歡心捐。

提刑使者還嘉州

使者艤行舟。是行及淒序。祖帳俯平沙。從騎羅前渚。一進酒惟醴。再進魴及鱸。遠客已少悰。況將啖宴語。勁風自薄林。寒流稍分浦。訟矢久已閒。農氓矧就緒。歲晏亟言旋。無爲負延伫。

提刑勸農使者還嘉州

案部聊北征。肅舲復東下。江溜澹泱泱。檣烏紛雅雅。離醕不餘杯。征棹亟沿洄。遠岫隨時見。幽花無候開。清氛霽平陸。林莽信重複。焚路繚山顏。馳田耨巖腹。屬此屢豐期。仍當省斂時。擊壤係途樂。餘糧尋畝棲。嘉陽信嘉處。時與賞心遇。霽樹抱空輪。寒濤下翔鷺。還轅眷仲秋。秋序日方逾。歸諾果無負。遲子臨江樓。

雜詠三首

有客款我廬。念我衰暮齒。自言上真書。有藥名不死。黃金乃能化。白髮安足治。謂我刀圭餘。已足度年紀。驅還扶桑面。黃昏付蒙汜。主人詭謝客。吾生本塵滓。少來誦詩書。不識怪神理。驚聞河漢言。浩然弗知涖。今也病未能。異日從吾子。

金爐焚蕙荃。香播蕙已灰。郁馥誠可貴。無乃爲蕙災。上瓦編翠烟。下礎挺沈質。所用不必同。相濟成宮室。樂羊振歸旅。光艷充國都。矜心激盛氣。奮若長虹舒。君王勞軍能。爲出一篋書。避席再拜跪。功非臣所圖。

不待一盈篋。寸書已有餘。成功在主君。斯語不可誣。

玉玫瑰

瑤楮鏤空濛。冰紉捲重疊。寒光欲衝斗。迴秀難藏葉。誰辟辟邪香。氤氲飛作蝶。

劉伯誠見惠僕所作中山雜詠石刻

衣冠昔奔波。晉社亦中徙。水府擁宮闕。六姓傳劍璽。名卿入理窟。黔首多兵死。真人剗墉障。六合如平砥。三山屹不化。城郭無形似。冥冥桑麻村。殘鋒出耘耔。前朝絕遺老。故事稽野史。我頃爲中山。蠲租案田水。剗木枕波濤。礮刀伐荆杞。叢祠及荒墟。幽處無不履。車停客登席。酒盡詩在紙。游深造遐邃。語苦出奇詭。投囊凡幾時。蓬塵失料理。劉侯見之笑。謂此那可毀。濡毫請揮灑。買石親鐫紀。嗟予政理疏。無德行崑壘。編民願尸祝。有愧庚桑子。惟茲楚客謠。可以傳下里。何時見椎擊。斷仆清江尾。

寫懷寄獻樞密太尉

僕本草茅人。守植自有素。偶與力運偕。牽絲及榮路。矢將保獨行。安敢邀詭遇。朝躋綠霧閣。夕舍金馬署。鷄志屈鴻翼。珉質謝瑤圃。內省實空虛。焉得久留處。悟非不必老。斑領況云屢。竟獲一麾來。果此避賢趣。載以朱轡車。佩以銀符兔。君寵寄華冕。耀醜不成惡。淮郡梁楚交。刀筆紛民務。粗欲逃官責。何暇收民譽。平生觀宗工。亟爲拯淪誤。慙負知己言。遂貽越鄉慮。何圖霄與泥。肯問簪與屨。辛勤風波事。尺牘奚能訴。

代馬愁南嘶。鷓鴣憎北翥。所戀明主恩。未理歸田畝。

瓊花

唐昌觀中樹。曾降九天人。變駕久何許。雪英如舊春。豈無遺佩者。來效捧心顰。

抒懷上孫侍講學士

僕本寒鄉士。始願託田隴。偶與亨會并。遂竊空名寵。疊冒信清閒。文書無倥傯。牽絲玷外舉。挾冊陪春誦。縹帙芸葉香。清池璧流璫。雖均五能知。猶冀三陌踊。有志慕孤直。多言畏奇中。往往犯怒狙。時時遭嚇鳳。脅肩方病畦。洗足幾成涇。言充衛士饗。賦葢吳人寵。但望不汝瑕。安能賈子勇。叢雲屬帝辰。烝汕樂賢共。前追三代風。旁鼓天下動。方正召華郤。賢良命晁董。務擢平津對。無罪賈生慟。哀然羣儒來。燦若春葩縱。咨予苦澁訥。望風猶陰拱。愁多目似蒿。疾久帶移孔。直慮醒而狂。遂同微且尫。三千御上方。八九吞雲夢。訂正清廟詩。自罷旅葵貢。夫寧本無志。良憂拙于用。擊轅固歌鄙。殢金誠外重。中夕撫躬嘆。明恩愧孤奉。況復年苒苒。坐驚頭種種。閒居昔有潘。廣宅今非仲。塵容化衣褶。雨氣昏刀鞬。所賴庇明慙。盱衡顧閒冗。每辨驢垂耳。力排儒發冢。不爾謝病歸。鉏釣事江葑。

溪上

溪上玩秋水。使人意自清。烈烈回颺餘。鱗鱗夕浪生。有魚可垂餌。有蒲可莖羹。況值新酒熟。鮭菜辛鹹并。



興來命一樽，樽至壺自傾。便值人間慮，浩然滄海情。

### 送行

秋日苦淒淒，味若蠶口辛。如何多感地，更送將歸人。高蓋浮清旭，長纓縛素塵。慘色動車僕，離言發坐賓。霜珂響征馬，星脂滑行輪。契闊何所道，良飯自饒珍。

### 曉櫺

曉櫺理斑鬢，蕭蕭徧愁顛。多病始計日，蚤衰不待年。青青固未幾，種種今乃然。寡髮有異象，施髮慙莊篇。且復委蓬葆，言就東山眠。

### 筠亭

山阿彼有人，蒼宇映脩竹。露籜新舊斑，風梢動搖綠。此君自虛心，主公今實腹。

### 送屯田張員外

飛霜遂凋節，歲箭忽已闌。奈何送歸客，置酒長江干。十載始一遇，別易會故難。此地嗟素領，昔日皆朱顏。詎意前歡餘，更爲後感端。行舟望不見，留驂相與還。芳訊幸無保，時付凌風翰。

### 古意

薄宦若秋蒂，飄然去林枝。盲風不我愛，吹墮清淮湄。淮南苦慘慄，九月繁霜飛。晚蕙相爲歎，崇蘭偕此衰。

凋落雖云苦，  
芬香終不移。  
但願陽春動，  
要當三秀期。

秋氣

清濁還二儀，  
秋氣颯然肅。  
溪潔潦已殘，  
林疎條自蠹。  
寒蛩思長堦，  
歸燕眷華屋。  
凋年自茲始，  
鄉懷念松菊。

感舊送虞曹楊員外

曩笑長者言，  
感恨歲時遒。  
不云笑未幾，  
倏已及衰路。  
卻懷眼中人，  
落落星向曙。  
寧無新相知，  
論新不如故。  
夫子惠然至，  
適慰離羣慕。  
締交三十載，  
契闊不同處。  
醜老向來妍，  
鬢黑今也素。  
伐木喜求舊，  
谷風念將懼。  
我顧濫榮班，  
君乃嘆奇數。  
根柢假容進，  
纏牽以長誤。  
久領一麾行，  
江湖極沿汭。  
杯酒曾未款，  
僕夫告方具。  
前樂暫還衿，  
後戚已盈慮。  
丈夫固有志，  
膂力經世務。  
何必常相從，  
卑若堂下屨。  
歲滿亟來旋，  
中朝著翔步。

擬杜工部九成宮

雲山鬱嵯峨，  
宮戶莽轆轤。  
摧峯隱馳道，  
鑿岫啟繡闥。  
游鷗逸飛翮，  
陽馬恣陵突。  
危淙注銅池，  
翠潏漱崖骨。  
落虹拖晨軒，  
奔蟾守夜窟。  
憑高眺鴻洞，  
念古一起忽。  
咄嗟有隋後，  
締構窮剗剗。  
徒矜昔日工，  
乃忘後世拙。  
居爲唐家保，  
功業何汨汨。  
牛酒望幸民，  
巖廊衛守卒。  
殘松抱空偃，  
臥楊委新伐。  
千載徧荒愁，  
金鋪鎖嚙崖。

望仙亭

淮山相蟬聯，  
萬景歸宇下。  
來波澹天末，  
歸霧滅巖罅。  
淒淒草色繁，  
肅肅桂叢亞。  
吾人愧攸館，  
僊屬冀來舍。

湖山

一水抱天回，干巖互相映。寒湖嚼沙痕，狂峯貫霞景。持此寫琴心，寧無子期聽。

勸酒

酌酒奉君壽，勸君慎勿辭。只今舉酒罷，已異行觴時。波瀾前後來，日月分寸推。稚容不耐久，縞領無停緇。獨醒信勞人，茲事定何悲。假今古無死，晝夜常倭遲。正恐爽鳩樂，後人非所希。

種竹

世皆笑幽獨，可不少自貶。種竹南軒間，亦足以相驗。況茲歲華晚，衆卉日凋斂。清節良自如，栽培匪爲諂。

涼蟾

涼蟾嚼殘雲，飛影上西廡。鵲鴉依空牆，蟪蛄已在戶。君行閱三歲，礪戰亦云苦。新衣本自綻，故裳復誰補。朔風萬里來，儻或從君所。風過無傳音，徘徊獨誰語。

楊祕校秋懷

上天分四序，素秋獨可悲。商風勁危條，寒露鮮繁蕤。依依燕去巢，嘒嘒蟬抱枝。撫物喟然嘆，流光忽已馳。危衿惡新壯，華領移故緇。願君策高足，無後功名時。涼風颯彫年，遙昔耿多慮。冽冽寒蟬鳴，離離客鴻度。之子懷茂器，有志康庶務。未蒙徐樂召，方感董生遇。

道局駿願達。絃絙危響赴。此際惻悵情。偕之歲云暮。  
治晚當樹蘭。治林當植桂。蘭生可香國。桂茂絕蕪薶。邈哉志士節。所趣與人異。意經千古上。心包九垓際。  
道勝外物輕。矧復韁鎖細。所以捨榆者。局局笑鵬翅。

眞珠龍柏

彼美夜光喻。益之新甫名。疊疊雲際艷。皎皎月中英。勿謂素爲絢。相期隆德聲。

度飛石嶺

人不怨飄瓦。何用罪飛石。石墜不可常。人值亦其適。去去走嶽崕。千金幸自惜。

擬王右丞瓜園

荷鋤往瓜田。煙蔓紛廣疇。植杖未及憩。有客眷林丘。騶哄羅戶前。冠蓋陰道周。進客北堂上。藉以氍毹柔。  
持盃再三跪。酌我清白酎。時時高興酬。矯首望神州。長衢貫廣陌。反宇注飛樓。惠風林間翔。早暉花上浮。  
新葉向蒙密。殼雖已凋啾。時哉物可玩。況復忘吾憂。故人心儻爾。駕言時見求。

寄題宮師相公宴息園

相公納衡樞。卜築來東里。恤他匪足尙。自適乃云美。中園興夷爽。薄言謝朝市。壤石非遠遷。松竹皆故薛。  
絳藹謝游軒。素波鳴楔阨。遐蒼眺京隩。側縹抱嵩趾。畦塍互演漾。灌薄紛蠶靡。峯峯相向山。濺濺自流。

高雲靡還期。冥鴻無墓理。公時挾勝想。竭來遡逸軌。逢觴卽陶然。坐樹亦欣止。冲情舍天倪。妙歌怯物類。揮金屢空鎰。愛客輒畱屣。式俾衛公壽。弗取安石侈。有守臥淮壩。聆風竦予企。他日果西歸。角巾望松梓。

小渠

唐溪析春澗。一股入清渠。循庭始演漾。走圃輒縈紆。淙淙漱幽石。唯唯泳纖魚。瀑來聊激濁。澄罷復涵虛。恃源纔自潤。流波愧挹餘。

曉過二里山

黎明走蒼山。千仞勢如削。北斗挂西巔。徘徊久未落。驛道轉巖肩。人烟聚岑脚。太虛交昏旦。顯氣自噴薄。陽光排暗升。陰氛值明卻。翔禽散喬枿。啼猿思空壑。逢隈霧尙屯。投險泉爭躍。生平好山意。每遭事嬰縛。安得乘冷風。窮躋叩寥廓。

思賢閣圖予真愧而成咏

忝中二千石。罷去輒圖真。揆予本完士。蚤蒙善養仁。執笏班華位。飛綏侍邃宸。如何金紫服。乃褻丘壑身。西南一面重。竭來駕朱輪。牽拙歲再期。初無德在民。形象安足紀。崖畧聊自陳。質陋眸子瞭。志泰眉宇伸。誰謂彼其子。而傳阿堵神。爵里三十八。自參豫呂公而下凡四十一人。赫赫多名臣。瞻前謝前哲。垂後慚後人。

九日藥市作

陽九協嘉辰。斯人始多暇。五藥會廣廛。遊肩鬧相駕。靈品羅賈區。仙芬冒闔舍。擗露來山阿。斷煙去岳罅。  
載道雜提攜。盈簷更薦藉。乘時物無賤。投之利能射。獲荅互作主。葳薺交相假。音架曹植謹雁今。韓康無二  
價。西南歲多攜。卑濕連春夏。佳劑止刀圭。千金厚相謝。刺史主求瘼。萬室繫吾化。顧賴藥石功。捫襟重慙  
惜。



